


張  
燕  
公  
集  
三



編主五雲王

編初成集書叢

集 公 燕 張  
冊 三

中華民國二十六年六月初版

撰 者 張 說

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

(本書校對者潘其璇)

# 張燕公集卷十八

## 碑銘

### 唐故豫州刺史魏君神道碑

公諱叔瑜。字思瑾。曰魏氏。鉅鹿曲陽人也。考太師鄭文貞公。致君皇極。配神清廟。故祖德胄系。敍于太宗之先碑矣。公生育慶緒。天然炳胎。教之資少。長德門。日用成躬。率之化性。盤于孝友。習狃于禮樂。俛仰中則。從容蹈道。加以專精。好古。旁通多藝。聖人之所志。聞一而反三。君子之所能。舉十而知九。與同生璘。琬。知名當代。始以門資。補左千牛。轉洛州司兵。司議郎。職方郎中。太子洗馬。出爲懷州長史。歷慶慈儀。豫四州刺史。春華。韓于兩宮。時雨。零于四郡。觀風之始。所在聲聞。變雅之老。到今遺詠。其年春秋五十有一。終于豫州。葬于舊城。夫人太原王氏。耐焉。禮也。議者以公不避強禦。有昭子之政事。不爲皎厲。有康子之隱德。虛己尚賢。有文侯之樂善。重諾分急。有信陵之高義。人鮮有一。況兼四乎。公賦入封君。妹歸帝子。車馬無戚里之盛。衣服有儒者之節。儉而得禮。富而無驕。此蓋奉先之素履也。公善于草隸。妙絕時人。以筆意傳次子華。及甥河東薛稷。世稱前有虞褚。後有薛魏。此又貽訓之餘美也。嗟夫。嗟夫。公學墜向歆。操齊固燮。若天假三壽。朝登六事。則鄭之桓武。可尋。漢之韋平。一揆。而年近知命。位止方州。落鵬翼于半霄。負天之力莫展。頓龍媒于局路。追風之勢斯畢。九原不作。誰將與歸。二子獻華。追存先德。俾子作頌。以慰罔極。

銘曰。

昂昂豫州。毓粹含道。欽若古訓。思文烈考。於穆烈考。維國之師。公承丕構。思皇纘之。發軔臺閣。風流榮問。建麾千里。澤霽四郡。位未充德。命不遂才。彼蒼孤善。謂之何哉。子孫必復。邱封永久。穆如清風。振芳厥後。

唐西臺舍人贈泗州刺史徐府君神道碑

敍曰。經天地。揭日月。文之義也。掌邦籍。出王命。位之崇也。本乎言行。君子之樞機。成乎易簡。賢人之德業。則徐公其人也。昔公奮明哲之資。當高宗之盛。天保定。俊又用章。而光耀天臺。雲飛綸閣。文敏以暢機務。稽古以析嫌疑。禮樂政刑。擇三代之令典。典謨訓誥。有唐虞之遺風。較然于庶績者。可得而聞也。其嘉猷讜言。沃心造膝。滋液內潤。精微外密。混成于元象者。不可得而聞也。公諱齊聘。字將道。姓徐氏。東海郟人也。遠祖偃王。基仁義于上代。嚴考孝德。濟宏美于近世。公始以宏文生。通五經大義。發跡曹王府參軍。右千牛兵曹。潞王府文學。崇文館學士。兼侍皇太子講。又芳林門修書。于時中朝碩老。下國英雋。皆忘年請交。不遠來謁。望其路者。若晨風之赴北林。得其門者。如衆山之仰東岱。公不樂趨競。雅尚退謚。深以椒房之家。聲名太甚。求爲外職。出宰桃林。未下車。勅改沛王掾。終歲選擬。司績員外司議郎。並不就。乞補雲陽令。到官累日。詔除司城員外郎。乃遷西臺舍人。其爲政也。如始云爾。初公幼而殊異。八歲工文。太宗聞其聰明。召試詞賦。錫以佩刀金鞞。稱爲神童。及中年。高宗嘉乃道優。悉命皇子受業。訐謨帝采。許以國鈞。故公備更潞沛豫諸王侍讀。上之在周邸。公嘗來誨詩焉。夫然集虎觀之書。承龍樓之問。二宗之代。矯首

辭林四王之門。從容經席。非有海山之藝。溫良之德。儀形以孚。柔嘉維則。其孰能發揮聖智。啓迪天人者乎。咸亨元年。出爲蘄州司馬。二年。坐事徙于欽州。君子大守道而小守位。汚隆隨時。屈伸以義。去令尹而不愠。失司寇而遂行。薰蘭敗。不爲不芳。日月蝕。不爲不明。古務忠信。何陋蠻越。優游欽江。歲餘而沒。春秋四十有三。惜乎不登宰衡。以平天下。夭夭是瘞。命也與。旣而慶隆嗣子。返公孫之楸。德施後王。拜先師之爵。上元三年某月。歸葬于少陵原。中興神龍元年。賜泗州刺史。褒賢追遠。念道尊師。聖人之禮也。議者以公考果州府君。高學才華。香名省闕。武帝賢妃。娣也。大帝婕妤。妹也。公旣高步掖垣。子又踐修舊職。同生標漢于鸞殿。重世含章于鳳池。自班姬父兄。文雄漢室。左思女弟。詞蔚晉宮。悠哉二族。徐氏三矣。才難不其然乎。凡是好文之君。賞音之士。公之逝也。豈不慨然。閱青簡而存凌雲之志。操朱絃而想流水之屬哉。厥子曰堅。景龍中。加金章紫綬。行禮部侍郎。得以命卿之祿。奉蠲潔之祀。無念烈考。樹之家風。迺刊石立頌。將以識往行。攄無窮。使本支百代。不忘先人之殞其名也。其詞曰。

王言維令。中禁是司。帝嘉文父。曰汝宜之。終溫且惠。習禮明詩。長裾入侍。大筆修詞。鴻業潤色。元黻緝熙。昊天大戾。君子明夷。蒼梧啓手。涅而不淄。中興受命。逝者無追。靈符泗水。崇贈先師。髣髴精魄。丕承聖期。教近子貴。榮躋父慈。學嗣三業。才俱一時。春秋孝享。霜露深思。後之視者。斯文在茲。

### 大唐中散大夫行淄州司馬鄭府君神道碑

五岳可陟。惟德也爲之崇高。萬物皆化。惟名也謂之不朽。若夫行欲蓋而德彰。道無求而名立。嘗聞其語。

今見其人公諱某。滎陽人也。華州刺史。襄城公。偉之曾孫。蒲陽太守。大濟之孫。荊州刺史。乾獎之子。在昔周王。敦敍九族。邦懿親于鄭。維時鄭伯。敬敷五教。賦善職于周。其後蕃衍儒門。光華士族。威行西域。名震京師。入則天子授經。出則單于抗禮。公揭日月。表山川。體二氣之清淳。納百代之層慶。越在岐嶷。異于常童。旣以冠帶遊皆長者。初以門子宿衛。解褐涼州參軍。轉嘉州司士。又宰鍾離。當陽二縣。皆秩滿兼攝。江陵期月。政不改俗。官不易方。羣盜出奔。遠人來附。其所處也。入境聞愷悌之聲。其所去也。扶路有鬱陶之思。非夫忠信以結之。法令以濟之。易簡以業之。仁義以肥之。孰能順人如此其理者乎。神皇玉册受天。金壇拜洛。頓綱而鶴書下。關門而羣龍至。公待詔公車。召議宣室。自以奇士。承一顧之恩。許其正人。參四率之屬。乃墨制除太子右清道長史。尋加中散大夫。行淄州司馬。負士元之才。于是拜職。遇邱明之疾。從茲挂冠。洛汭閑居。漳濱沉痼。優游卒歲。福應愆期。豈惟朋友之哭。將見神仙之弔。享年七十有九。神龍二年夏六月十五日。終于洛陽之私第。冬十月一日。葬于滎陽之原。成先志也。公執親之喪。三年泣血。以聞州里。不亦孝乎。先人餘業。一物不有。以讓兄弟。不亦悌乎。加以賑窮紓急。隱德陰施。惠人由己。反身待物。是用氣類益親。聲談載路。善擊劍。好投壺。盡五射之妙巧。究六書之體勢。此蓋行有餘力。則以多能。位不充量。天之命也。有子曰博古。曰傳雅。曰嘉徵。曰嘉慶。曰嘉重。生極其養。沒過乎戚。恭惟皇考。安宅靈邱。盛德備于卑位。家風缺乎國史。伐石他山。寄哀詞客。子產遺愛。得無叔譽之言。公業不忘。實有荀攸之歎。式撰鴻烈。垂之後昆。銘曰。

大君有命。桓公封鄭。世執王政。其後不兢。爲韓所并。以國成姓。沈水截河。溢爲滎波。荆山之阿。勝氣實多。高門義義。袞服委佗。猶嗟君子。世濟其美。動如義市。居成仁里。鳳集文史。猿啼弧矢。善政當官。惟人所安。救危拯越。勞而不伐。大運奄忽。芳留形沒。高隴旣封。深泉又重。徑無人蹤。蒼苔歲濃。哀哀邱隴。墮淚青松。

唐故贈齊州司馬陸公神道碑

公諱孝斌。字順。姓陸。河南洛陽人也。其先帝媿啓姓。陳胡立族。敬仲之孫。有齊國。宣王之弟。封陸鄉。蓋命氏之所由興也。秦并諸國。陸氏分適燕魏。文成帝時。東平成王俟。生平原簡。王麗。重世游美。爲國之華。公卽簡王七世孫也。曾祖彥昇。北齊以文藝高選。仕秘書郎。以至德表所居。號終孝里。祖元亮。隋鷹揚郎將。父淳感。盤桓利貞。弓招莫進。同志誅行。諡爲惠康。自成簡至惠康。孝悌仁義。世不殞矣。公誕靈冲和。稟識高明。簡而中禮。易而達節。篤學勵行。著實飛聲。文史者宗其淵府。德行者仰其墻仞。舉國子明經。選絳州參軍。台州司法。其在官也。示人親其親。長其長。不苛察而小無廢。不皎異而大有成。知識日明。常澹如也。喪親過哀。因中風廢。臥疾累年不起。楚邸肇封。大羅雲逸。雖沉疴未弭。而僉望先歸。授楚王府兵曹參軍。實有躬降師賓之禮。目擊儀形之訓。府罷。換趙州錄事參軍。以病去職。聖厯元年。匈奴入趙。公危邦不處。盡室以行。望河南而將濟。至黎陽而疾甚。年六十二。十月丁未。終於姚村之逆旅。歸殯于滏陽之郭北。光天二年。皇帝踐祚。以故吏贈齊州司馬。惜哉。用公之道。行公之志。上可以序三光。下可以平九土。存則位不充其德。沒則榮不逮其身。命矣夫。夫人范陽郡太君盧氏。故岐山丞元瑾之女。恭儉之德備。貞信之教。

興。妻道母儀。自家刑國。享年七十有六。開元六年十一月丁未。終于洛陽之宣教里。八年五月丙子。合葬于漳北之神崗。禮也。初咸亨中。王師征遼。公參是軍事。友人太原王守義。遇疫于海東。路艱寇阻。兵危勢急。公獨顛沛致喪。歸其井邑。其在安州也。朝廷以公精達法理。乃命復囚劍南。梁岐冤繫。動盈千百。丹筆所詳。十全八九。其舍生狗義。反已施仁。皆此類也。禮莫重乎飾終。于是見其不朽矣。善莫大乎餘慶。於是知其有後矣。四子。伯玉。仲容。叔獻。季良。泣血銜恤。視天若墮。俾予作頌。式昭遺烈。銘曰。

曠哉陸公。覩奧臻妙。文雄外柄。清明內照。從政本仁。資忠移孝。不言而理。正身作教。才何富之。命何負之。居喪柴毀。遭疾棲遲。垂彼雲翼。落此盛時。歿後榮進。終延贈寵。德之休明。位匪爲重。嗟嗟千載。賢士之隴。

唐故瀛洲河間丞崔君神道碑

蛟龍蟠乎沼。無雲雨而不翔。君子志于道。無運命而不彰。然則變化者。是神靈之末。富貴者。非德行之本。守其貞。樂其分。不其至矣。世有人焉。君諱漪。字某。博陵安平人也。在唐爲姜姓。炎帝之孫也。在周爲崔氏。齊侯之胤也。遙源長發。洪河之水。接于天。層盤列秀。太行之山。拒于海。東觀所以美其文宗。北州所以貴其清族。魏冀州刺史簡公諱纂。君之高祖也。齊散騎常侍諱缺。君之曾祖也。隋大理少卿諱世立。君之大父也。故祁陽令諱杭。君之皇考也。承百代之隆慶。總五德之清淳。孝友忠肅。宣慈恭儉。好古博雅。鄰畿亞聖。盈而若虛。漠而無象。非夫入周公之廟。升孔子之堂。則憲章禮樂。鮮得其門而覩矣。弱冠以門胄入國學。舉進士。母弟汲。亦以明經。同年擢第。大理卿張公文瓘。人倫之表也。目君曰。昔兩劉並舉。以爲騁二龍。



焉。今兩崔齊飛。可謂儀雙鳳矣。搢紳景慕。憧憧往來。徙宅就居。投刺成市。若衆流之赴壑也。及親而仕。盤桓利貞。解褐澤州晉城尉。降爲光州安樂尉。換蘄州黃梅尉。轉河間丞。凡更三尉。佐四邑。體公綽之不欲。勵伯夷之高操。臨事以簡。御人以寬。雖爲小政。必有可觀。故八使巡風。再薦清白。河上遺老。江濱舊吏。吟咏餘聲。祖述前事。人到于今稱之。若夫碧樹烟藹于江潭。紅荷藻耀于澤畔。寶貝烟光于空浦。美玉明潤于斷岸。不爲珍輿瑤輦之飾。前殿後池之玩。誠自得焉。必將有賞心之所歎也。況乎殿邦光國之寶樽。俎柱石之器。道爲帝王師。言爲天下利。已而稅遠駕于窮轍。頓高才于下位。亦無惜焉。固將有知音之所歎也。垂拱元年。奉使上都。遘疾終于時邕里之旅館。享年六十有二。夫人河東裴氏。湖州治中懷儉之孫。滌州司馬昉之女也。稟訓華室。作合高門。嗣徽先姑。克和娣婦。德容之盛。圖傳罕有。喪親過哀。舜華朝落。儀鳳中。卒于鄭。春秋二十有八。長安三年春二月。合葬于金谷鄉邙山之陽。禮也。北據高岡。連隴南。而大道禁林。上國皇州。川原指掌。仙門宰樹。碑闕相望。元靈嘉之。是安是宅。嗣子曰。景龍中。爵安平縣子。職兵部侍郎。夙遭閔凶。不承誨誘。慎終追遠。克家用譽。蒙聖主拔奇賞異。絕等超倫。三顧赤墀之下。一舉青雲之上。祿廩所資。吉蠲致美。實先人宥十世降百祥之所及也。夫惟官不達者。身不登乎明堂。行不夸者。名不書乎史冊。則韜光隱德之緒。俾後代將何述焉。夫銘景鍾。稱茂伐。彼大夫之事。篆豐石。揚令名。此孝子之志。辭曰。

維嶽建國。厥生炎帝。維師尙父。諒彼武王。古人言曰。必齊之姜。齊之丁公。後有崔子。因邑命族。世濟其美。

黃鵠倚歌。雕龍擅史。倬哉嗣武。含章挺生。以蒙養正。用晦而明。混之不濁。人莫能名。學以崇道。文以慰志。垂其雲翼。坦然卑位。祿逮吾親。榮非我仕。皇皇上帝。建官惟賢。有人在下。胡寧捨旃。孰云輔德。曾不永年。展矣邦媛。宜其家室。友如樂諧。皎如月出。重壤旣兆。終天偕畢。北陵墳邱。松檟千秋。金碑石樓。祇令人愁。東都城郭。通澗纏洛。飛橋連閣。金管迭作。人世之傳然兮。山川之宛然兮。德音之緬然兮。

故洛陽尉贈朝散大夫馬府君神道碑

君諱某字某扶風人也。其先伯益贊禹中衍御殿。在周曰嬴。在晉曰趙。上卿以人歸政。將軍以馬服爲姓。緝熙乎平通重合。焜耀乎伏波中水。我高祖汾州刺史諱歸歡。我大父鷹揚郎將諱仕幹。嚴考獲嘉令諱果。濟美惟舊。寘德于君。君幼而瓌奇。長有規操。樂道稽古。升堂視奧。伯父匡武撫之曰。亢宗保家。吾有望爾。悉以先人家謀圖傳付之。入太學。舉明經。補巴西尉。內憂去職。君四歲而孤。重集于蓼。因心孺慕。名教同傷。歸次葭萌。江溢毀道。攀轎號慟。濤爲之却。蜚人哀之。葺棧而濟。釋服調襄陽尉。主進魚家絕鱸食。州將魯王俾盤二百魚。時其亡也。遺之。夫人以辭。君還拜受。使復王曰。非惟是夫。又亦賢婦。吾嘗其一。得其二善焉。長史盧幼孫。悅是獎也。舉君清幹。有聞。授清城尉。未往。且有後命。爲河西營田判官。物土穡人。藁穀洋羨。皇揆其懋。考績登焉。程務挺之軍靈夏也。咨君運籌。乘遮入幕。獲虜數百。欲剿罄之。君諫曰。王者之師將德。是以討叛惟武。攜遠在寬。搏牛之豨。不可破虱。未擒伏念。何逞纒囚。乃止。師歸策勳。上柱國。改溫縣尉。永淳祖飢。廣提中外。絕甘分少。約己周人。旣喪好速。室無嬖御。夫人張氏。詹事丞師寂之女也。敬

事皇姑。能佐君子。娠有胎教。宗如樂諧。前誌之美。多所闕載。絳郡夫人王氏。則天聖后姑之女子。而夫人之母也。嘗曰。婦則女訓。吾女有焉。享年不永。元髮徂落。時君之伯姊。歸宗夫人。推居癯寢。事之而躬處下室。及亡。設几筵于正寢。惟明靈以女公之故。憑巫通夢。屢寢爲辭。舉家懇啓。久而後定。嘻。生則盡禮。死而知讓。殆其神不昧乎。溫秩滿。轉洛陽尉。當周之興也。版都社。澤郊廟。倅紛獄。僕明堂。京穀回回。日不暇給。又勅君專總徒匠。凡三百有餘旬。蘊勞成疾。眇憂損壽。永昌元年孟夏辛卯。卒于官。春秋五十有七。帝用悼之。贈朝散大夫。旌淑紀庸禮也。龜玉在山泉爲國寶。以其靈與瑞。君子居下位而上達。以其名與義。夫是之寵。有由也哉。葭萌之戚。昭其孝也。揚侯息浪。異類肯感。襄陽之饋。識其潔也。德刑于家。聲聞于外。墓垣之讜。植其仁也。衆俘賴全。將不爲暴。重屋之役。底其勤也。沒而益榮。朝不棄力。有一于此。猶爲令德。況備舉乎。豈惟其身。將施其後。厥子構據。擇皆國之良也。爲有後之。其是在乎。徵構職太子僕。景龍初。宰長安。永惟考襲朱芾。已佩葱珩。母氏早逝。而榮不及。乃讓賜階。乞封先妣。天子憐之。制贈夫人清河縣太君。人謂長安能報恩矣。詩云。欲報之德。昊天罔極。此之謂也。馬氏之墓。世在扶風。清河之喪也。卜宅于洛陽邨山麓。後君捐館。因窆其所。夫人穴于兆之甲。大夫窆于域之庚。今龍集戊申。將返葬故國。君執友禮部侍郎嚴善思。諗之曰。夫子之逝。一終八辰。精氣其存親壤石矣。吾嘗相二士。從新其愈乎。且不戀本達。不合葬古。神尚休。無或變。有夢先君者。與其言叶。于是祇率嘉話。卽安成規。埋雙墳。溝四壟。傍建祠宇。前勒豐碑。茫茫天地。永懷長畢。誰居後之人。匪惟是四時蒸薦之事。所以觀百代祖宗之烈。其詞曰。

昂昂大夫有邈其致。洽聞膺敏。調窮錫類。孝實迴川。清能改位。佐邑惟五。安人則四。多稼穰邊。昌言扈帥。比義后稷。勤官沒地。歔歔朝天。蠶衣以遂。我有合德。追啓清河。宜家族揉。主祭神和。親戚光貴。劒蓋金歌。相從先後。樂此山河。

# 張燕公集卷十九

## 碑銘

### 常州刺史平君神道碑

公諱貞叅字密一字間從燕國薊人也蓋晉之公族有韓國者列于世家韓之餘子食平邑者因爲氏姓有漢丞相改造繡衣在魏薊侯宅茲元社故瓜瓞綿于三輔枝葉盛乎兩燕魏齊之間世濟其美公卽北齊司空公鑒之曾孫秘書郎子敬之季孫故偃師令直容之叔子鍾積慶之洪胤包太和之粹靈敦龐沉靜直方簡易仁義根心政理率性度以禮義文以詩書戶部尚書清河崔知悌朝望人倫公之文友深賞延譽遠近宗焉始以司成館進士補盧州慎縣尉刺史盧寶胤舉器藏下寮轉冀州大都督府曲沃縣尉換晉州洪洞縣主簿北平陽道昕氣尚標舉河東裴知禮鑒裁精別陽推以孝友資身裴亦薦以經邦興化徙雍州新豐縣尉盧少儒引爲檢點判官差卒選校小大推允休議登聞擢監御史裏行奉使黔中監選有牂牁謝鳳節仁奏罷漢官專任首領公上其挾姦樹黨俶擾藩落天子悟焉再使置吏遠夷騷而旋定舊貫改而復完又駟牧在野攘竊是繁耗以歲月莫之禁禦公輶車上隴羣慝畢露表監官斛斯果之輩奪職者九人沒賊者萬計牧圉知禁思無邪矣開耀間吐番侵境師族不給乃購運酬勳募耕入選利之所聚詐亦居焉公與大理正王守一於河蘭鄯廓四州推獲餽糴王希古盧種王誕其徒二千餘人正

處其罪。爰得我直。授監察御史。內難去職。居喪過毀。死。孝貽憂。光宅初。肇延兩臺。分典百郡。服闕。授右臺監察御史。巡察河南。澄清郡邑。昇賢。弊罪。能執其中。類功最。加兩階。拜右肅政殿中侍御史。郎官法。天古難其選。固美斯在。再拜司勳員外郎。永昌中。遭凶黨網羅。爲周興所奏。貶温州固安令。州特舉清白。改鴻州櫟陽令。邑多滑人。屢宰。收駕。公威簡有素。誠結無欺。率是而行。人用不擾。獄行自靜。狼戾反慙。詔書嘉譽。加朝散大夫。又羅密徒貝錦。爲河內所鞠。降括州員外司倉。尋而事白。進吉州司馬。神龍中。興官反。舊政窮鱗。沛而縱壑。墮羽翼。而順風。拜司門郎中。兼衛王司馬。無何。正除衛王司馬。拜太子左庶子。以節愍之禍。出爲涪州刺史。未往。又轉瀘州司馬。致仕。久之。景龍中。復起。左諭德。兼榮文館學士。詔曰。公措紳耆彥。操履清淳。令譽播于始終。嘉績宣于中外。儲闈論諭。雅望尤高。宜中朝典。俾加徽服。可銀青光祿大夫。又攝詹事。東都留守。拜常州刺史。居歲餘。優詔致仕。享年八十。先天元年仲冬。薨于河南之正平里第。遺令近地。便葬。斂以終服。開元二年冬。卜葬于伊闕之西。夫人河東縣君柳氏。祔焉。禮也。公出入四朝。歷官二十。其進也。皆擇能錄勤。惟德是與。其退也。必含垢受屈。在涅不緇。子文之量。從可知矣。凡撰淳孝友悌傳各一篇。以匡儲后。撰先君親友傳十卷。以篤故舊。撰家譜家誌各十卷。以明系本。撰河南巡察記十卷。以辨風俗。非通理博物。立誠錫類。其孰能見志以著書。因事以設誠。若斯之盛也。有文集十卷。行于代。初公侍祠清廟。有髦士之宜。而先考偃師。贈蒲州長史。自祖考三葉。瑩無碑記。公諮諸通儒。而追建銘碣。幽趙之士。以爲美談。夫爲子則頌德。以尊祖。飾終以榮親。孝之大也。爲臣則不枉毫髮。以顧私。不避豺狼。以

撓法忠之至也。潔志則利不涉口。欲不萌心。清之源也。履道則不俛眉以悅勢。不屈色以苟容。正之方也。詩曰。仲山甫舉之。公有其德。傳曰。左邱明恥之。公有其直。總是四善。遠齊二賢。于是芬苾令問。優游眉壽。惠風激于勝流。不績敷于哲后。然以忤彼權貴。保茲介特。不登三階。以正四國。貞白之似。懷焉太息。其孤摠授。充窮泣血。靡所寘懷。俾予作頌。布哀豐石。恭惟先人之寮友。常奉長者之話言。公雅珍確實。不尙華靡。敬慎風規。直紀行事。業廣詞褊。萬無髣髴。少子授八分之妙。獨善當時。公平日惠愛。故存之刊刻。詞曰。義義淑德。克生休命。履孝蹈忠。含清體正。如玉之潔。如金之鏡。高明洵美。學以潤之。官方正事。靜以鎮之。嚴嚴憲府。公三峻之。赫赫儲宮。公三訓之道。有行廢時。有泰否三入三出。無慍無喜。鼓缶而歌。懸車致仕。全歸葬儉。允也君子。西山幽幽。東川悠悠。雲過墳闕。風薄松楸。人亡道存。榮往哀留。貽世作則。行歸於周。

太子少傅蘇君神道碑

按文苑英華盧藏用序張說銘

惟唐景雲元年歲在庚戌十一月己巳太子少傅許國蘇君薨于崇仁里之私第。春秋七十有二。嗚呼哀哉。粵明年三月己酉朔葬我公于武功之先塋。禮也。公諱瓌。字昌容。京兆武功人也。其先出自帝高陽。厥胤曰黎。實勤火正。逮昆吾之子。始封于蘇。以國受氏。公其後也。暨漢平陵侯子侍中嘉。魏侍中則。晉尙書。遼聯華國圖。代載明德。公高祖周度支尙書封國公。諱綽。立言成務。垂法後王。曾祖隋尙書僕射開府儀同三司雍州牧諱威。嘉慕成績。懿于當代。大父隋尙書職方郎中鴻臚卿諱夔。理綜羣品。識覃衆妙。烈考秘書丞沁台二州刺史。追贈岐州刺史諱某。遊藝聚學。素風不隕。公系上聖之遐緒。鍾盛德之衆茂。資元

和以體仁。穆清明以成美。初孩而孤。稟絳郡夫人之慈訓。幼而岐嶷。聰敏冠常。始讀山棲志。一覽便誦。及長。博通經史。尤善屬詞。年十八。進士高第。補寧州參軍。轉恆州司法。丁絳郡夫人憂。自中出。涉寒。從至京兆。哭不絕聲。性以禮全。形以哀瘠。左庶子張大安。以孝弟上聞。服闋拜恭陵丞。轉相王府錄事。王改封豫。官亦隨府上。帝卽拜朝散大夫。尙書水部員外郎。未幾兼侍御史。淮南廉按。俄轉夏官員外郎。兼宮允丞。歷水部祠部郎中。兼判司理事。以親聯出爲朗州刺史。轉歙州刺史。武興令。檢校冀州刺史。累遷汾鼎同。汴陽陝。以累最入爲尙書。又拜右丞。加銀青光祿大夫。遷尙書左丞。戶部尙書。又拜侍中。京師留守。兼理冤滯。車駕還京。持節河北安撫。加金紫光祿大夫。轉吏部尙書。東都留守。尋追還。守本職。尋拜尙書右僕射。同中書門下三品。封許國公。修國史。今上踐祚。拜尙書左僕射。屢抗疏乞骸。優答不許。拜太子少傅。公長子頤。歷給事中。中書舍人。嘗與公聯侍紫墀。接機黃閣。前後之拜。近古未有。公體道貞固。立志簡直。多識前言。遍詳舊事。自周隋損益。家牒可紀。公則紹之。罔不畢綜。故閨門之內。孝弟成則。朋友之間。忠信克舉。其在參佐也。婉孌柔嘉。醜夷不爭。其事藩邸也。從容諷議。賓寮是仰。四爲郎而彌綸之功。布於省閣。九爲牧而循良之績。著於州郡。周旋二轄。焯耀文昌。迴翔兩宮。耀鑠巖廟。版圖國之信。而五教在寬。冢宰人之紀。而九流式敘。左右端揆。盡訃謨之略。東西掖闈。備忠讜之美。德逾盛而心益下。位彌大而行益恭。用能高而不危。長守富貴。考父三命。謙光數朝。平仲一心。中孚累聖。非至德淑憤。疇至此哉。夫其仁恕篤密。清廉簡惠。躬儉約以自持。蹈名教以檢物。祿以周給。不積于家。財以睦親。必均于衆。故義廣而私謁之途。



阻名揚而兼濟之道宜。茲亦叔敖之賢。國僑之懿也。幾深通志。精悟默識。然文以蹠迹。靡約其華。學以辨微。固伸于己。故始終機揆。舉無遺策。斯又子房之智。孔明之能也。造膝沃心。務存匡救。引過稱善。不近於名。故聲聞于天。而口無擇。績宣于事。而心罔專。蓋叔子之仁。孔子之慎也。兼斯衆善。以享明德。方將三階載理。兩宮更曜。天命不佑。奄忽遷殂。朝喪其楨。人隕所戴。天子悼焉。臨遣大府卿李從遠。策書弔祭。輟朝三日。有司備禮發哀。追贈司空。荊州大都督。賻絹八百段。米粟八百石。凶事葬事。並官給。賜東園秘器。大鴻臚卿監護。官爲立碑。皇太子別次發哀。遣洗馬弔祭。賻物二百段。義和擇日。太常考行。朱旗載路。班劍啓行。哀榮之禮備矣。諸侯之孝終矣。公家代尙儉。載在縑竹。其生也。門無生賓。堂無雜客。其終也。塋無封樹。隧無碑表。大漸之始。遺令遵行。顛等泣血受命。罔有踰越。雖逼朝旨。不旌墳壙。建碑于塋北。一十五里。故文藝之行。經緯之迹。雖備于國章。布在人口。懼違先訓。皆略而不書。中書侍郎。同中書門下平章事。范陽張公。雅俗之鎮。具瞻令德。文章之雄。談者爲楷。偉公道德之首。微猷可行。刊石紀頌。穆如清風。詞曰。斤斤蘇公。體正合道。稟靈淳粹。爲唐元老。忠以衛主。孝以立身。文以經國。惠以安人。司牧九郡。九郡爰靜。平章百工。百工爰整。千載典憲。三朝綱領。上纂先人。五代相國。下垂餘慶。七子令德。帝謂庭頌。伊公是似。接待玉墀。序拜金屐。聯華疊潤。佐我天子。於戲彼蒼。國幹云亡。地頽五岳。天折三光。備禮詔葬。羣官會喪。掌史司德。刊銘路傍。

邢王府長史陰府君碑

公諱某。字某。武威姑臧人也。昔恭王之裔。別封于管。有夷吾者。能霸桓公。則平周。辭上卿之禮。適楚踐大夫之職。以地命氏。授于陰城。新野之涼。皆爲著族。貴則重族。二后榮則一門四侯。道則山紀神仙。行則禮題忠義。建名崇德。世有其人。公高祖湘東內史鏗。梁州之子。屬詞比事。天下宗之。曾祖江州刺史通道館學士顯。祖朝請大夫國子博士弘道。考某官景明。貽範清白。纂烈文史。累善所徵。及公而盛。公承禮樂之峻。尚稟清明之異姿。天生粹靈。氣合真素。下帷專思。重席擅業。至人藏用。有道德之卿。君子爲儒。無榮辱之境。尚東郭以自逸。與南容之不廢。調補陳州司倉。徵其志也。以爲非足利時。不容終秩。遂優游初服。述祖移年。嘿志元言。洞心清律。常手操經籍。耳練宮商。澹有怡神。坦無嬰慮。是可忘機造化。豈徒屑意公卿而已哉。故德充以外形。才全以內濟。委懷從運。與道無名。尋拜命宣城王府記室參軍。退一隅而无悶。進三府而交辟。署宰長河。曲資而往。曰。惠人無小。吾所從之。其至也。去惡如救焚。急賢如濟渴。遇物風偃。推心理俗。平其志而異物不遷。一其誠而萬情咸括。清猷美績。克存餘詠。飛狐之地。戎馬生郊。俾公爲蔚州別駕。則惠化所存。勇且知方。肇建天人。懋官靈器。入爲慶王友。轉太子中允。又拜國子司業。邠王府長史。或舉德以進。或尙閑而退。不失其正。達識推高。某年月日。寢疾東都。終於永豐第。春秋七十有五。惟公率心經于德義。檢口絕于臧否。秉禮樂而視正直。蘊文藻而含清真。可不謂才全而蹈道者歟。位不兼濟。惜也。夫人范陽縣君張氏。丞相燕公之妹。玄思妙德。嬪風女師。梁氏義輕于前志。曹門克貽于後範。府君之喪。紀纊將縞。晝哭成疾。恐流年之易除。慟累月而云逝。沒而不朽者。非禮節絕倫之謂乎。春秋若干。以某

年月日合葬于龍門南陵原禮也公無子有二女咸以淑行著于通門喪葬克家感戚行路子塔吏部郎中吳興張瑜度支員外郎隴西李愷永懷清水緬託貞石庶乎時遷陵谷猶徵少女之詞道在宗親不味諸姑之德大人爲頌俾小子序焉

賢哉陰侯孝友仁信符彩外發清真內鎖史門文宗國子儒胤克家踵武金聲玉振結髮筮仕利用勸心雉馴風化鹿賦文章函丈禮樂雷門紀綱微言教出直道匡王年惟大耋克茂精爽疾不彌留怡然長往世比過隙生猶絕響契均范張會阻天壤通家自昔永懷厥初昏姻之故言就我居富同鼎食窮共園蔬動心規戒言成著書奪我良友天其喪余南望龍門東都九原萬籟酸骨千霜斷魂琴瑟都盡墳塋半存葬收子塔碑傳外孫人生到此天道何言

贈戶部尚書河東公楊君神道碑

若夫孝在揚名忠歸令德事因感激氣概生焉時逢述難勳業成焉桃李灼灼不自言于蹊逕松柏青青不受令于霜雪窮獨善而無撓達兼濟而弗矜子曰君子哉若人吾河東公之謂也公諱執一字某弘農華陰人也司徒觀王雄之曾孫鄆州弘農公續之孫潞州胡城公思止之子戶部尚書相國執柔之弟觀公侍中恭仁公之伯父也安德公尚書令師道公之叔父也在隋則二代五公在唐則一門三相公台輔積慶稟清明之識河岳會靈資磊落之氣體剛毅深於城府蘊規略長于襟帶戲爲軍陣敵國之勢幼成請學兵書長城之望早集年甫十六先君捐館七日絕飲三年泣血縞綬有制儒家嘆其從禮柴棘加等

議者憂其死。孝清門祖德。貴胄能貧。太夫人在堂。有致力之養。非躬藝黍稷。不以供甘旨。非手樹桑麻。不以薦絺纊。年逾一紀。勤不知勞。既極安親之心。方展事君之節。乃濯纓潢渚。獻策金門。于當代之聖君。論天下之成敗。秦皇覽奏。屏左右而與謀。漢帝聞言。膝前席而不覺。一見拔玉鈴倉曹。再見取尙食直長。三見真典設郎。驟進直詞。深觸權嬖。爲易之兄弟所嫉。左授伊川府果毅。又上封章。帝用嘉納。加游擊將軍。右衛郎將。歷左清道率。換右衛中郎。押千騎。使總統貔虎。便繁肘腋。故得叶心五王。戡剿二豎。奮飛北洛。推戴中宗。嗣唐配天。不失舊物。以匡復勳。拜雲麾將軍。右鷹揚將軍。封宏農縣公。賞未充庸。且有後命。贈冠軍大將軍。右威衛將軍。進河東郡公。邑二千戶。賦四百室。俾之鐵券。恕其十死。又錫天馬端錦。珠盤瑤爵。文綾五百。縑素三千。分三土之上。腴處五等之高。列珮戈紫綬。環衛於鈞陳。玉瓊黃流。侍祠于清廟。豈知覺結梁魯。政回豔哲。里克納惠。而爲戮。葺宏城周。而見咎。彼五績之摧頽。此三黜之連躓。出爲常州刺史。以太夫人年老。乞避卑濕。特降中旨。轉牧晉州。駙馬都尉琅琊王同皎。親賢地切。休戚圖深。安劉之策未遂。鍾室之哭先及。吏扇分獄。公陷關通。貶徙沁州刺史。不知事仍長在。夜魂九逝。非北首而無歸。晝戶重扃。異南冠而同紮。果能推分榮辱。忘懷生死。人不堪其憂。公不改其操。久之。盡削官封。放還侍母。梁山雨雪。不隔曾氏之思。王畿風景。來就潘園之養。尋而大勳不廢。天道復反。歸旣奪之。井邑起故時之將軍。擢衛尉卿。復初封爵。巖巖劍閣。蜀之險要。嗷嗷飛鴈。人未安居。飢渴仁明。輯綏凋弊。又授公劍州刺史。蔚彼黍苗。樂我膏澤。內憂遠計。殞絕經時。于是搏膺星奔。徒跣求路。雨不接乘。夜不解纒。因心通禮。朝流欽

德有命奪情除汾州刺史。知團練兵馬。哀訴不允。金革無違。中國簡穡而有備。單于遁逃而遠跡。詔徵爲涼州都督。兼左衛將軍。河西諸軍州節度。督察九姓赤水軍等大使。公富以農政。和以師律。彰信蕃部。赫怒軍容。斷匈奴之臂。積路安而不警。張漢家之掖。雪山開而無寇。遂攝御史中丞。爾書勞佚。緝賞稠疊。又轉牧原州。未發。復授涼州都督。改右衛將軍。使悉如故。尋移許州刺史。未到。以單于款關。授右衛將軍。檢校州勝都督。兼處置降戶使。懷柔以德。種落宜之。徵還本官。又兼原州都督。方屬降戶。讎叛河朔。傲擾邊城。聳蹙諸將。無功強修。連率夏州。按察關內。羽書日夜。俾遷郡牧。公按甲待敵。確乎不動。虜騎畏威。竟無來掠。向使迴避。行于一步。則攘竊起于萬端。十將耗五。數年未復。既而強公追隄。朝端延賞。徵拜右威衛大將軍。進檢校右金吾大將軍。尋而卽眞。禁衛肅然。異于他日也。皇上哀庶戮之不辜。念羣雄之自孽。大軍之後。荆棘生焉。乃命公攝御史大夫。爲朔方元帥。公剛腸嫉惡。擒姦摘罪。曩將之所彌縫。宿吏之所乾沒。匿贓散廩。一徵百萬。矯枉過正。衆口囂然。改右衛大將軍。無何復右金吾大將軍。金刀更新。靶鞘仍舊。巖廊益峻。微道增清。又改命紫光祿大夫。鄜州刺史。人寬吏急。猶前政也。享年六十有五。開元十四年正月二日。薨于官舍。闔境發喪。列城望祭。古之遺愛。何以加焉。天子傷之下詔曰。故官某。夙負名義。早著勳庸。居內外之職。備文武之任。忠勤匪懈。誠節無渝。奄焉殞沒。情深悲悼。可贈戶部尚書。歸賻成喪。有加恆數。維公以孝敷聞。以忠特達。以幹述職。以能典兵。凡領郡十四。將軍十二。再杖節鉞。三執金吾。一至九卿。二兼獨坐。儼有直色。僞無媚辭。銀艾復乎舊德。珪爵傳乎祚胤。全志節于夷險。與福祿而終始。諡曰忠公。

朝之令典也。夫人新城郡夫人獨孤氏。左威衛大將軍贈益州都督卿雲之女也。婦德母儀。中外師範。開元四年。先公卽窆。以今十五年六月。合葬于咸陽之洪瀆川。禮也。其孤濯注等。銜恤靡訴。託詞疇識。感稱代之垂文。哀劬勞之罔極。銘曰。

堂堂楊公。神密氣雄。苦身難孝。正國危忠。落彼狡童。樹此帝功。昔稱關西。今也河東。觀王之裔。珠華玉麗。重葉尙主。三朝嬪帝。韡韡七德。詵詵六藝。公之亢宗。鬱爲世濟。涼鎮西方。邦臨北隅。天子授斧。將軍剖符。青蛇入筥。白獸銜珠。去持玉節。來執金吾。轉余爪士。守于鄙時。明察號神。仁恩名子。武都右折。文昌星死。素蓋歸飛。黃泉已矣。卜葬卷阿。哀榮孔多。尙書鼓吹。太守虞歌。碑流雨迹。松引風過。獨封茅土。長誓山河。

# 張燕公集卷二十

## 碑銘

### 齊黃門侍郎盧公神道碑

有齊黃門侍郎范陽盧公諱思道字子行涿人也其先姜姓世祚東海別爲盧氏家于北燕自漢世中郎將植至侍中陽烏徵君之子稟天霧傑承家令軌清明虛受磊落標奇言不詭隨行不苟合游必英俊門無塵雜至於求己勵學探道覩奧思若泉涌文若春華精微入虛無變化合飛動斯固非學徒竭才仰鑽之所逮也事齊歷散騎侍郎以翰林直中書中廢復進至給事黃門侍郎待詔文林館武平末天子擽兵禦寇太子監國于晉陽公留綜宮朝兼典樞密及皇輿敗績於外而百寮蕩析於內公節義獨存侍從趣鄴告至行賞授儀同三司入周除御正上士定省歸郡郡人祖英伯作難公脅在其旅幽都旣平玉石將燎賴元帥宇文公特舉以舊有令聞引謁因命草露板立就駭其麗異其敏釋於齊斧之下揖于羣士之上除掌教上士隋高祖爲丞相也遷武陽太守以母老乞解職優詔許之後復徵爲散騎侍郎奏內史侍郎事隋開皇六年春秋五十有二終於長安反葬故里凡更臣三代易官十七再降一免二去職八平除擢遷者四而已公處屯安貞賦詩頽飲視得失蔑如也臨難無懼在黜無愠危不去主仕不違親休明有賓禮之盛顛覆無淪胥之禍其大雅者歟夫禮儀損益公能言之故與熊安生詳定齊禮三墳五典公能

讀之。故與薛道衡侍學儲后。公國華人望。光照鄰邦。故所居之朝。應對賓客。修詞抗議。允執其中。故青瑣黃纁。異代咸掌。大名之下。豈誣也哉。昔仲尼之後。世載文學。魯有游夏。楚有屈宋。漢興有賈馬。王楊。後漢有班張。崔蔡。魏有曹王。徐陳。應劉。晉有潘陸。張左。孫郭。宋齊有顏謝。江鮑。梁陳有任王。何劉。沈謝。徐庾。而北齊有溫邢。盧薛。皆應世翰林之秀者也。吟咏情性。紀述事業。潤色王道。發揮聖門。天下之人。謂之文伯。於戲。國有校家。有塾。祿位以勸。風雅猶存。然千數百年。羣心相尚。競稱者。若斯之鮮矣。才難不其然乎。然則飛黃虛騁。百轡遺路。鷗鵬天運。萬翼無階。文士擅名當時。垂聲後代。亦云才力之絕。衆故爾。開皇以來。百三十餘載。天贊唐德。生此多士。公之元孫曰藏。用濟美文館。重祿黃門。永惟衣冠子孫。邑里多改。先人封樹。歲久將平。迺假詞。非才刊石。表隧庶乎。涉齊地者。不薪柳惠之隴。過邢山者。無惑子產之墓。至矣乎。盧氏之子。其用心也遠矣。銘曰。

或或黃門。實天生德。才蓋一世。榮聞四國。文王既沒。文在人宏。公爲宗匠。當朝與能。龍躍春霽。鳳鳴朝升。或頌或變。或雅或承。理以神合。聲以妙徵。高視睢渙。與君代興。人之云亡。十有一紀。斯文未喪。施於孫子。新作豐碑。德音不已。

贈吏部尚書蕭公神道碑

仁以度心。施物義以由道。利貞孝以養志。安親慈以教忠。有後舉四行之尤善。成百代之餘慶。蓋得之於蕭府君矣。公諱灌。字元茂。蘭陵人。帝高辛之苗裔也。元鳥授命。教敷五德。白雲入房。網開三面。微子封宋。



樂叔居蕭氏族之始也。相國下秦大夫師漢門閥之宗也。大齊以蕭竹膺期。踐皇帝之位。大梁以木刃興運。張天地之圖。傳寶祚於一家。易鴻名於兩漢。青蓋入洛。重南國之衣冠。白馬朝周。盛西雍之賓客。公卽梁宣皇帝之元孫。明皇帝之曾孫。大父南海王珣。入隋封梁國公。纂德乾坤。承靈睿哲。舊邦雖改。見周鼎之時。輕新社。仍封知晉圭之必大。考鈞中書舍人。率更令。宏文集賢兩館學士。學窮秘隨。文標宗匠。廣博幽深。契神無迹。溫良恭儉。與道爲徒。是謂啓迪後昆。而焜耀前烈者也。公總山河之粹氣。注日月之末光。心根孝友。器包禮樂。動躡思後。故口無擇言。照在機前。故身無擇行。加以啓蓬山之塞路。入藏室之元關。四科得游夏之門。六藝取鍾王之雋。年十八。明經高第。補代王功曹。王昇儲。改通事舍人。又換內直監。曳裾西苑。擅文士之場。束帶東朝。首正人之列。尋以外艱去職。王戎死。孝時論憂之。閔子免喪。良心未盡。乃不就祥縞。不撤几筵者久之。或曰。懷其寶。迷其國。行其志。約其親。可乎哉。公曰。吾過矣。不得已而外除。不擇官而祿仕。拜國子監丞。以婚姻之故。出爲甘州司馬。徙集嵐二州司馬。轉渝州長史。其從政也。反身以惠下。推誠以敬上。老吾老以施教。幼吾幼以字人。執是心也。何往不濟。故歷佐之邦。必僻陋知方。戎蠻變俗。狼戾馴軌。貪饕寡欲。迎新者望風而歌來暮。送故者計日而戀不足。詩云。淑人君子。正是國人。能長人之謂也。太夫人在堂。有羸老之疾。公因使入計。得扶持還京。下巫峽之波。上當陽之坂。展轉在側。殷憂歷時。夕不安枕。衣不解帶。及板輿長稅。遂扶杖不起。子春視疾。加損徒勤。石建執喪。悲哀自絕。永淳元年八月。寓居穰縣。終於苦蓋。春秋五十有九。先君之服也。三年有終。公過時不釋。聖善之喪也。五十不毀。公戀

親滅性。君子曰禮也。夫可謂至矣。夫人京兆韋氏。祖雲起。兵部尚書。父師實。秦州都督。公卿令族。蘭杜齊芬。鳳皇飛鳴。始正家道。珠玉秀色。終高母儀。年五十有四。長壽元年十月。逝於京師。布政里。粵以二年二月辛卯。合葬於少陵原之先塋。禮也。其孤嵩。克戴聖君。以宰天下。大福再成於身後。馮恩廣運於泉路。開元十七年仲冬癸丑。詔曰。中書令嵩。父某。毓粹冲和。降靈神象。言入精微之奧。迹登聖賢之軌。位不充量。道足庇人。松檟雖幽。音徽不昧。宜承追遠之慶。俾崇冢宰之榮。可贈吏部尚書。同日詔曰。嵩母韋氏。門傳一經。行包四德。才淑冠乎邦族。言範光乎母師。誕茲寶臣。作子良弼。封其石窞。俾承土宇之榮。表以金章。永闕珣璜之飾。贈魏郡夫人。於是建宗廟。修禮物。榮君後命。告我前人。遠哉心乎。一恩一敬之感會也。如是垂裕立訓。克家揚名。遺愛至矣。慎終備矣。東武公之子孫。共連塋闕。南城侯之夫人。同刻碑銘。詞曰。維蕭係宗。出宋之子。天命齊歷。河圖梁紀。累帝重王。雍容文史。是生邦俊。世濟其美。仁義孝慈。中和庸祇。文章鳴鳳。禮樂元龜。碣館枚馬。儲闈潘賈。人望國華。風流儒雅。歷佐列郡。政成休問。行立時法。言垂後訓。沒而益榮。追位冢卿。哀感有情。事傳無聲。墓門松平。碑字金生。不知千古。誰游九京。

故括州刺史贈工部尚書馮公神道碑

金之爲寶。百鍊而惟精。玉之稱德。久幽而不昧。聖人美焉。君子比焉。可鑠也。不可奪其剛。可毀也。不可汚其潔。偉哉馮公。秉斯操矣。公諱昭泰。字遇聖。長樂人也。說學於古史。豈不聞舅氏之厥初乎。畢公建德于周。畢萬大名於魏。別封之裔。遂氏馮城。秦則丞相並時。漢則將軍重世。積仁鍾慶。王者鬱興。問晉南浮。因

燕北號家變成國。爲天下雄勳業競五伯之先。子孫齊二王之後。公卽昭成皇帝之十世孫也。高祖大將軍隨州刺史長山公謙。以寇恂之才。翊戴周武。曾祖兵部尙書左僕射魏國公世基。以曹參之力。經濟隋文。大父尙書左丞檢校御史大夫少府監揚州長史安昌公長命。以佳吏之名。勤勞王室。考仁高亮無祿。子道不究。故公幼而襲安昌公焉。清明激澈。標格峻堅。夏翟耿介。無矯飾於韋絃。寒松清冥。不受令於霜雪。專經觀奧。習法精理。起家左奉裕。改讓賢府果毅。換文州司馬。爲酷吏所陷。罷官久之。調榮州長史。屬城慢法。按而繩之。入計會府。讎家橫訟。明勅杖其愬者。遷公宋州司馬。朝廷翕然。知有王法。復假右臺侍御史。江南道廉察使。類會高等。加朝散大夫。進潞州長史。堆岸受湍。孤醒見嫉。轉湖州長史。公束濕不同。聚蚊交訟。貶爲饒州司馬。未行。降使詳覆。拜鄂州刺史。制曰。卿志氣剛勁。操履貞潔。歷佐藩條。咸有聲稱。詰姦糾謬。不避強禦。苦節清威。若凌霜雪。頃因讒毀。遂有貶降。使者案問。皎然明白。俾從優獎。特加寵命。其在江夏。異政風行。入爲太子家令。兼知內外鑄錢事。國泉是殷。盜鎔乃絕。河朔淫雨。帝思作又。俾公檢校邢州刺史。散有賙無入忘。歉歲帝乃璽書勞焉。其旨曰。卿忠於事君。簡以臨下。忘私徇公之美。歌謠所載。擒姦摘伏之奇。吏人攸仰。雖陳朔之貶黜。邪慝王業之斥除。貪殘無以加也。一郡清淨。副朕意焉。其後以戚累移睦州刺史。復爲羣小所譖。左授泉州司馬。未之任。又貶榮州司馬。公砥節荒服。天高聽卑。除溫州長史。俄復舊階。拜括州刺史。水國澹沏。告疾言歸。景龍三年六月十三日。終於蘇州之逆旅。春秋六十五。正人歎息。舊位傷感。公清白傳家。信義高世。門有奇士。室無長物。夫其善於鈎距。長於衿帶。法嚴令

峻人寬吏急當官而行不避讒慝之口除惡務本不求愷悌之譽出入從宦十有六職以謗獲貶者五洗謗特遷者四不曰忠乎將無悔於九死不曰直乎焉往而不三黜故人謝而名益著迹遠而風可懷也皇上志其持法無撓贈大理卿本其坐樹無言謚之曰節窳窳之事一以官供哀榮之禮被於存歿是時天子嚴謁山陵訓人追孝推恩庶辟瀉澤幽泉公長子少府監紹正次子給事中紹烈並構層堂仰延榮贈乃贈公工部尙書君子曰孝必錫類忠則不墜臧孫達其有後乎鄭公業爲不亡矣夫人琅琊君左相邢公及善之女垂拱二年三十有六而夭後夫人彭城君鴻臚卿善因之孫女景龍三年五十有五而逝所謂齊姜昭前邦媛輝後碧樹先落悲同孫楚之妻紅蘭漸苞貴在馮勤之母以開元十八年十月壬寅葬我節公於長安縣高陽原夫人王氏劉氏祔焉禮也長子紹正少府監第四子紹忠未仕第五子紹烈御史中丞孝乎二連之心思崇三絕之美魏王來顧賞幼婦之碑秦師不侵尊死士之隴揚名稱代道遠乎哉銘曰

古之志士忠不爲難倬哉馮公矯此雲翰翼翼羣小彼何足算屢困終直天下改觀經用百年窮達相半貽慶二子雙承天渙嚴嚴大理人命是懸聖朝表贈王道無偏六卿冬官百工攸序韓稜雖歿龍泉可許邱陵鼓舞兮桑改壑遷歲月崩波兮有去不還唯德音與頌石兮傳不朽於人間

唐贈丹州刺史先府君神道碑

府君諱隲字成隲范陽方城人也張祖曰揮帝軒之後肇勳弦木錫姓上矣詩有卿士孝友史有留侯世

家八葉至東漢司空皓公子宇北平太守始居范陽四葉至西晉司空華公子越散騎常侍乃僑江左昆  
孫太常復歸河洛故河東有司空砮洛陽有散騎里後司空至府君十二代不失仁義矣王父諱弋周通  
道館學士考諱恪無祿早世府君榮生遺育四代單緒家世尚儒不及伯魚之訓外祖爲理遂讀臯陶之  
書以明法歷饒陽長子二尉介休主簿拱洞丞以所願乎下事乎上以所願乎上交乎下反身與人何往  
不順臺選貞白覆囚山南人謂是行有典刑矣吳天不弔年五十二調露元年十二月乙卯捐背於縣廨  
夫人長樂縣太君馮氏父威藍田丞敬修法度踐涉圖史顧復幼孤將就成立家道不殞夫人是賴享年  
七十二傾背於東都康俗里第光珪說不天夙遭閔凶又集荼蓼先王制禮不敢從滅以景龍二年七月  
己酉安厝於萬安山陽耐從周制也惟先君不祿俸不奉親不機杼不資身僚舊無雞黍之接況其非類  
乎族姻無魚菽之受況其人吏乎是全其高而善其獨也過四十始閱六籍觀詩得之厚觀書得之恆觀  
樂得之和觀禮得之別觀春秋得之正觀易得之元曰君子多乎哉事斯一言而已矣每誦道記三復三  
寶曰至人之心有以垂世又聞之太夫人云吾有子五十載非其疾無一日之憂太夫人亦云吾事夫子  
三十年耳無忤聲目無暴色先君之違世也其憂戀者尊門在殯歟聖善在堂歟我諸孤無日敢忘及王  
母終養二祖封崇亦尙克家成遺訓矣若夫安親孝也宜家義也翼子慈也軌迹隱乎含光故當代罕耀  
馨香發乎潛德故明神終勞先大夫久而益榮沒而不朽蓋此景雲二年天子嘉侍臣之匪躬念前人之  
蘊德二月乙巳詔曰故官某毓德高邁藏器下僚代載儒雅家傳清白河東佐邑長不欺之風山南覆囚

溢無寃之聽。徂謝永久。邱墳不飾。啓茲令胤。貞事先朝。宜崇追遠之恩。以表揚名之志。可贈使持節丹州刺史。王澤漏乎泉壤。國禮崇乎宗廟。漢帝論士。恨不見李牧之爲人。曾子思親。泣無逮楚王之厚祿。道存運往。痛矣。餘悲緬存。前哲之所以聞無聲於四海。視不見於百代者。匪銘頌歟。桓麟蔡邕。其則不遠。嗚呼。霜露交積。松檟滋深。兄弟永懷。相顧將老。胡伯虎豈敢掩大人之清。陳季方何足知家君之德。小子銜恤。非曰能文。莫假辭於他者。務傳信於我也。銘曰。

猗嚴考。用元妙。體太和。竭高志。貞夫一戒。其多孝于親。正于家。刑于訓。清厥心。晦厥迹。畏厥聞。寶如何其。謙儉孝慈。皇哉褒德。永世有詞。

# 張燕公集卷二十一

## 碑銘

### 和麗妃神道碑奉勅撰

舊史云軒轅帝宮次星具黃龍之體。郊媒神祀。次妃成元鳥之命。非聖也。莫能法天。非天也。莫能感聖。則有相乎坤而母乎震。齊乎古而合乎天。跡雖祕絕。猶可測而言焉。麗妃趙氏天水人也。麗者以華美爲貴。妃者以配合爲尊。易云日月麗天。傳稱星辰合度。麗加妃號。自我爲初。原夫八駿勤周。肇有封姓。三軍霸晉。乃蕃卿族。說寶符而開國。曳珠履而成家。果驗成宣之後。不乏文忠之慶。堯門昭殿。何代無人。暨乎紫氣上通。瑤臺獨立。楚宮選美。納良袂於神雲。漢掖求才。進團扇於明月。故坐而論教。則位比三司。動而具瞻。則儀刑六列者矣。先將軍以恩澤授職。太夫人以有禮封鄭。流車躍馬。豈無甲觀之親。湫宅閑門。不有椒房之勢。探風揆化。憂國如家。故聖人有以尙其德也。躬親繭館。義形熊檻。退席以愛禮。樛木以廣恩。望古難臻之地。必爲常踐之域。故聖人有以嘉其志也。懸象告沴。經時寢疾。在蒙被之辰。答還輦之問。生可捐於浮假。心獨係於元貞。神往上清。願承恩而入道。形歸下土。期去禮而薄葬。慈顏同氣。奚敢爲言。皇上闕而許之。咨嗟不已。開元十四年。春秋三十有四。七月十四日。薨於春華殿。殯於龍興觀之精屋。示以出家。從道例也。命河南尹監護。河南令副焉。喪葬務約。成遺語也。二十六日。窆於故都之後。邙山之陽。孺慕

承華淒涼薄室。列薤歌於東路。迴容衛於北山。壽堂一閉兮。凡聖等人。代同悲兮。修短間。月帳雲衣。綈以神仙之服。上房陶篋。旋於造化之初。此皆聖主之曲成。賢妃之本志。何必雲陽山下。別起通靈之臺。未央宮中。虛立致神之帳。若夫易名之典。考行是存。帝諡曰和。禮之貴也。氣之和者。生萬物。聲之和者。孕八音。魂知後命。感聖恩乎。有詔史臣。恭銘內職。事出彤管。辭無華飾。寫樂池之永傷。寄瑤山之罔極。銘曰。帝妃佐后。實掌陰教。八月選才。千金聘貌。禮獻絲繭。詩修澣濯。婦政可尊。嬪風須效。皎皎漢女。爲皇降靈。娥娥邦媛。順道之經。結以印綬。華光後庭。帶之兮鞶。朗潤前星。退述潛運。夙承嘉獎。謙苦中京。崎嶇上黨。金鏡開目。明珠耀掌。心方樂於時泰。魂奄悲於化往。紫雲衣兮霓裳。送美人兮北邙。白壤宮兮青松苑。去君恩兮日遠。秋風急兮霜天。草木黃兮野田。滅香容於空櫛。留畫像於甘泉。春秋以麗和之二字。獨褒美於千年。

鄆國長公主神道碑

臣聞堯有娥英。致九族之敦序。舜有霄燭。動百里之光耀。大聖之後。天必縱之。積善之家。神所慶矣。豈惟上帝之女。雲漢爲靈。平王之孫。肅雍其德。連華前志。世有其人。皇唐鄆國長公主者。睿宗之第七女也。母曰崔貴妃。構累聖而成門。合濟美而爲室。蓋乾坤之純粹。演日月之清明。神媛誕靈。常言所絕。免懷之歲。天奪聖善。不食三日。哀比成人。文母流胎教之慈。曾子得生知之孝。由是宮闈延矚。邦國遠聞。及乎玉笄耀首。油駢在馭。錫之美地。邑以荆山。求之令族。嬪于薛氏。爾其居玩圖史。動修法度。服其澣濯。恭儉之教。



興鼓其琴瑟。敬讓之風被。其行己也。安親惠下之謂仁。敬宗合好之謂義。降貴接卑之謂禮。恕情周物之謂智。推心而行。罔不該備。其理家也。侍膳饔餼之均和。主饋醴醢之品齊。絲竹五音之徽靡。纂組九華之絢麗。經目所涉。莫不精詣。每至三元上賀。五日中參。進對詳華。折旋舒婉。故以式瞻貴里。儀範通門。如花之汎惠風。百卉之涵膏露。窈窕之儀克舉。蕃衍之福大來。有男子四。女子五。瑤碧生塔。芝蘭滿室也。習禮明詩。日漸庭闈之訓。銀章艾綬。地連恩澤之輝。自先朝徹辰之辰。迄公主成笄之日。外除過制。內疾餘哀。手寫金字梵經三部。躬繡綵線佛像二鋪。貝葉真偈。現心相于銀鈞。蓮花妙容。呈意生于玉指。孝思惟則。道遠乎哉。開元繼明。推恩由己。進封鄜國長公主。食邑一千二百戶。田賦廣而彌儉。禮秩尊而益恭。其後君子晨歌。夫人晝哭。未亡爲稱。生意盡矣。撫視遺孤。將守柏舟之誓。志期剝落。永從柰苑之遊。朝制斷恩。改降鄭氏。陵谷可移。隋和之德不昧。寒暑有遷。松筠之性如一。均養七子。麻廕二宗。汾陰之室。忘亡榮陽之黨。相慶。旣而善福虛應。寢疾彌留。盡國醫之技。遠方畢至。供御府之藥。中使相望。命之必至。不可支也。堂邑山林。忽焉瘁色。平陽歌舞。適足愁人。開元十三年二月庚午。薨於河南縣之修業里。春秋三十有七。震悼紫庭。哀傷朱邸。傾家若墜。舉國同悲。有詔光祿卿孟溫禮。監護喪葬。京兆尹馮延休副焉。窀穸之禮。一如涼國公主故事。夏四月。恩旨陪葬於橋陵。不祔不從。古之道也。皇上念同氣之致美。感閔川之永謝。恨棣華之半缺。悲瑤草之先化。乃命國史。昭銘懿迹。降恩禮於雲露。寫哀詞於金石。水非湘渚。還起帝子之祠。山是潯陽。卽封天妹之冢。銘曰。

帝系白雲仙源紫氣張家成國承天作貴赫赫聖祖曰文曰武皇皇睿宗一變萬邦挺生淑媛慈和孝恭清臚如神蛾眉無雙邸第立官湯沐建封爰及笄總禮施環珮鳴鳳獻祥乘龍擇對帝唐降女天乙歸妹珠玉過庭蘋蘩正內蛟門早聞龍湖忽上無地何載無天何仰金殿書經華絲繡像欲報之德昊天罔極孰是言歸良人永違銀爐烟斷羅幕霜飛懇願毀形託身壞衣不諒人只改嬪他士稟命曰從從人曰順息嬌繩楚懷羸羈管反經合權與道同韻燠休二室均歡等潤四海謚清九族和平萬物向榮衆雛未成心戀盛明形隨落英祖載鼎城歸窆咸京挽歌敬聲鹵簿凶行哀哀聖情惻惻同生橋山片石千秋令名

延州豆盧使君萬泉縣主薛氏神道碑

或稱達性命者齊生死之域違憂怖者一修短之數斯蓋無心之論耳焉足與議於情哉何則雲虹滅影詞人於是詠謠華秀從風君子爲之歎息豈不以對仙麗之景懷變化而遺戀在韶蕊之節悼零落而偏憤吾見豆盧氏之子於其伉儷有焉縣主諱字薛氏河東汾陰人大父駙馬都尉奉宸將軍諱瓘尙城陽公主考駙馬都尉散騎常侍諱紹尙鎮國太平公主其在昔也夏有車正先封周有薛侯爭長其在今也五宗姻於帝里重葉母於王姬河水經天上積星辰之氣霍山鎮地下多珠玉之林縣主幼而敏惠長而洵淑貞義孝烈之傳吉凶賓祭之儀一聞成誦絃緹紉組之製潛毛醞羞之品一見縣解至乃鶴迴清汎蠶聚崩雲月韻攷砧花穠綵樹婦人能事咸臻妙焉大聖天后鍊石補天有王母之神器分茅列地啓弄孫之美邑封猶有禮義引而親天授三年四月內封萬泉縣主天愛下流口親上簡乘龍之舉和鳳爲

難絡八紘以選門。布千官以求俊。夫以龍圖帝寶。祈步搖之華源。虎戟侯門。襲京燕之雄胃。人之信美。帝用嘉焉。以萬歲登封元年。仲春既望。歸於豆盧氏。六宮送行。百寮供事。迺以鸞輅。遣以翟車。環珮冕旒。粲然在馭。黼藻朱黛。爛其盈門。詔婚之禮。於焉爲盛。爾乃移其愛敬。以事舅姑。仲其友恭。以諧公妹。舉宗洽比。如鼓瑟琴。每至婚姻會同。少長咸集。珩璜節步。金翠耀首。有婉嫵之心。無驕矜之色。嗒盼矚者。若遲日之映漣漪。瞻詞氣者。猶光風之轉蕙。加以引納懷和。饋分周賑。疎屬自附。窮歸忘窘。故蘭行彰信於閨門。而薰風滿盈於邦國。諒惟琬琰之性。自美。抑亦劬勞之訓。致焉。中宗孝和皇帝。雲迴南土。龍見東京。二儀更闢。九族咸敍。望我兄兮。公主贊陶均之力。曰吾甥也。縣主開井邑之賦。神龍元年春。加實封三百戶。縣主旣通籍門闈。奉御又尙司殿省。天子巡遊宮觀。觴樂池臺。我有周親。無時不從。主家外幸。比齊后而聯恩。子婿中參。與趙王而均禮。或醉飽無度。寒燠未平。何嘗不御藥在門。王人接路。當時厚澤。莫之尙也。景龍四年二月。以奉御出爲丹延二州刺史。保傅下堂。隨朱轡而同去。輜駟入郡。與皂蓋而齊飛。辭宮闕而歲闌。戀庭闈而日遠。肥泉永歎。邪氣攻衷。楚祝招而不來。秦醫來而不及。景雲元年八月二十一日。傾逝於延州之廨舍。春秋二十有四。美玉褫顏。明珠晦色。平陽舊宇。遂無望於歸寧。懷縣新文。空留連於永逝。有子三人。西華南容東里等。或齷或岐。呱呱而泣。天何以罰。神其忍之。冬十有二月五日。歸葬於長安之洪瀆原。窀穸營護。有命加等。器服祖遺。率由舊章。生之也榮。葬之也禮。若夫柔嘉好合。善之原也。肅雍降貴。謙之道也。山河其德。容潤廣也。熊羆其祥。祚胤大也。總衆美於修嬈。馳落暉於小年。此所以哀中之

又哀也。昔袁亡馬氏，蔡筆斯奮。鄭喪曹姬，潘文亦作。矧茲內範，事華無媿。砥望夫之石，以表靈邱。緝幼婦之詞，將傳終古。銘曰。

薛之皇祖，胄軒國禹。相般侯周，氏其土宇。英英白雲，鬱彼河汾。公門蕃衍，銘鼎氛氲。則仁則義，則戚則勳。餘慶分祉，誕靈女士。中宗之甥，鎮國之子。皎如霜雪，華如桃李。舜族爰序，堯封咸秩。萬泉開賦，三百其實。守盛以儉，居冲不溢。亦旣鳴雁，宜爾家人。謙恭下下，撫納親親。傾財致客，對饁如賓。我有邸第，前臨黃道。我有池塘，却望青草。漢輦停暮，秦簫拂早。歲月易忘，歡愉難保。良人出守，將命北徂。與子偕往，飲別東都。望母腸斷，辭家淚枯。露萎勁草，霜酸衆雛。魂兮何歸，京兆之野。葬於何處，杜陵之下。巖巖雙闕，列列行櫺。勒是徽音，以觀來者。

鄭國夫人神道碑奉勅撰

鄭國夫人者，宏農楊氏之女也。開元神武皇帝惠妃之母，曾祖諱堪，以禮樂習文，爲越州司馬。祖衍以折衝學武，爲游擊將軍。父宏以門才入仕，爲雍縣丞而承早卒。初則天之代，夫人言歸武氏，曰：恆安郡王，生惠妃及家令忠。太子僕信，開元十年三月，終於通化里。其四月，卜宅於少陵原。哀子銜恤，號旻仰訴，怨報德而未待。託思齊於永慕，皇帝愜鸞殿之內憂，悵鶴池之外慘。揚淑聲而金石刻，揭高行而天地感。國史司文，命爲鄭志。若夫清明下濟，嶽瀆上昇。祥會德門，慶育邦媛。神授孝理之性，天啓聰達之心。加以潤澤詩書，游玩圖傳。伯宗好直，預戒將亡。重耳羈遊，先稱必霸。豈直漢庭章奏，假借仲長之才。周官禮儀，咨稟宣

文之學。昌言嘉論。有如此者。螭首螭頰。修眉橫波。既工嘲笑。易爲容止。肅恭而不跼。舒和而不倨。商周革命。遇屯有怡。懌之顏。桑霍傲子。在貴無驕。矜之邑。端容一貌。有如此者。紘緹祭服。闕翟朝衣。纂組入神。剪製驚國。雕胡之餅。露葵之羹。五齊六清。三醢七醢。咸一見而洞理。或不習而知。和女工中饋。有如此者。惠妃載誕。皇子在者。四人驪泉多龍。丹穴皆鳳。克岐克嶷。預見元凱之才。實覃實訐。早聞霄獨之豔。亦關陰德之潛襲。胎教之密傳乎。又名子以義。成家以禮。忠者以令德爲忠。信者以不欺爲信。傳云。去食存信。信而有徵。經云。移孝爲忠。孝則不匱。周宗咸覆。紀季獨存。至德深圖。有如此者。辟司徒之妻。邑其合禮。南城侯之婦。封其舊功。況夫慎徽四德。四德咸舉。經論二義。二義克從。匿武收繼。趙之勳。產姚承配。夏之慶。吹凱風於椒掖。外王母於梧宮。盛德大業。窮光極榮。啓國西鄭。不亦宜乎。十數年間。二子榮立。每至四時令節。六參嘉會。魚軒照門。暉艾交室。爲壽則珠貝山積。侑幣則錦綺霞飛。白玉滿堂。聚姻親而同有。黃金作穴。散隣里而無餘。君子欽其布義。聖人嘉其寶儉。故寢疾則飲食天廚。湯藥御府。匪日伊夕。上官絡繹於閨庭。終送則戚儀傾都。車騎壹日。自宮徂野。中使相望於道路。哀榮之盛。書記罕聞。猗與。所謂小君之遺美。聖善之高烈者也。如使後代。考南史。議西陵。披簡牘而歎息。臨山源而茫昧。旌賁之道。不其闕而然則外孫之碑。武檐之石。非明淑之壠。其何設焉。辭成進御。帝稱曰善。顧謂尙扎。我其書之。於是灑翰黃縑。縷字青琬。波橫雲蹙。神變豔爛。於山門。鶴倚鸞翔。生氣宛延於松路。禮尊事絕。恩榮迹遠。斯又元德動天。幽誠迴日之奇致也。誰昔未覩。名言莫逮。銘曰。

代有母德。厥氏楊兮。祖考爲士。夫爲王兮。聖后中葉。摠萬方兮。天命未改。復歸唐兮。賢淑啓佑。繼絕亡兮。宗周雖滅。神女昌兮。建號西鄭。榮舊鄉兮。魚軒翟茀。盛龍光兮。二子雙飛。華綬章兮。出入輪奐。庭鞞煌兮。去此昭昭。卽茫茫兮。何處詔葬。少陵阜兮。貴妃慈親。侯王舅兮。寒暑流易。山川久兮。古墳坡陁。老樹朽兮。壽宮靈慶。百代守兮。頌石光華。于載後兮。

穎川郡太夫人陳氏碑

穎川郡太夫人者。諱某。雷州大首領陳元之女。羅州大首領楊歷之妻。驍騎大將軍兼左驍騎大將軍。虢國公思勗之母也。陳氏家富兵甲。世奠嶠外。夫人誕靈豪右。淑問幽閑。六行天至。不因師氏之學。四德生知。無待公宮之教。原夫陳本嬌水。楊承赤泉。九真爲郡。良史出乎中國。五馬浮江。僑人占乎南海。兩州接畛。二門齊望。卜妻鳴鳳。擇對乘龍。楊公有聘玉之祥。應嫗獲探金之慶。虢公弱冠昇仕。鞠躬禁闈。正性本乎胎教。剛腸形乎義色。神龍三年六月五日。北軍作難。西華失守。騎入宮壺。兵纏御樓。公孤劍凌鋒。羣兇奪氣。倉卒之際。安危是屬。旣立殊常之勳。遂蒙超次之命。授銀青光祿大夫。上柱國。宏農郡公。行內常侍。其後改拜將軍。太夫人是加爵邑。高堂九仞。重祿萬鍾。朝廷美其揚名。州黨尊其遠聽。夫人富而好儉。貴而能勤。身却錦繡。手親紡績。公每昏定晨省。夫人必誠之忠孝。勤學文武。嘗謂汝稱思勗。當心念其義。父母名之。欲汝三思而勗勵也。故號公便習干戈。漁獵書史。致命伐罪。擒叛獠於百越。寫誠誓衆。破狂蠻於五溪。鬪子弟如使手足。請風雷若應期契。聖朝答高秩於驃騎。爵大封於虢略。豈非以辭第之懇忠。成斷

機之明訓。臣節立矣。君恩厚矣。子孝成矣。母慈著矣。備此四者。善孰加焉。抑神道祐心。而人倫興行。詩曰。母氏聖善。又曰。宜爾子孫。斯實穎川太君之有也。享年若干。開元九年四月八日。薨於長安之翊善里。先公早世。邱墳故域。古無合葬。禮有從宜。夫以體歸下地。萬里豈殊乎黃壤。魂何不之。雙棺幸同於元室。以其年十一月十六日。招魂祔葬於萬年縣龍首鄉神鹿里。申孝子不忍隔親之情也。恩勅賜錢十萬緡布。皆百段。日。礪忠厚。漢武知其母教。馮勤寵貴。世祖稱其母德。克軫天情。頗爲連類。號公生盡其禮。沒盡其哀。嗟閱水之日逝。懼藏山之夜徙。追鏤碑板。遠貽圖傳。蒸蒸至意。有足感人。恻恻信言。固無媿色。銘曰。陳公舜後。楊侯周裔。去國何人。南遷幾世。鄴線嶂表。珠崖海際。兩族相京。財雄兵銳。猗歟邦媛。儷茲國上。友若琴瑟。華如桃李。心契法度。容和愷喜。資敬從夫。移忠訓子。嘉此令子。南溟北歸。于天鶴唳。拔瀚鴻飛。朱宮退敵。銅柱來威。國安家寵。魚軒翟衣。子封號國。五公前宇。母邑穎川。二君舊土。感激崇慶。踟躕今古。高堂夜空。弔客朝聚。龍首山前。前臨灞川。招魂五嶺。合葬三泉。山山邱墓。樹樹風烟。孝碑不滅。茲墳永傳。

故吏部侍郎元公碑銘

英英白雲。瑞彼君輅。佻佻公子。嘉我王度。魏后遺德。作華天朝。雲氣應變。直心遙遙。麟閣書仙。鳳池墨妙。太常國禮。少宰邦教。公之處之。有倫有要。玉折其貞。金斷其清。歿而不朽。仁乎令名。

昭容上官氏碑銘

天降時雨。山川出雲。乃生靈媛。祚我聖君。精微其道。煥炳其文。三光錯行。昭容綱紀。百揆繁會。昭容條理。

外圖邦政。內諗天子。憂在進賢。思求多士。忠孝心感。天焉報之。吉凶有數。孔焉禱之。如彼九日。羿焉暴之。如彼三良。秦焉悼之。漢宮選才。班氏其特。楚史書霸。樊姝之力。或穆齊公。敘明其德。嗟爾彤管。是鑒是則。

貞節君碣

神功元年十月貞丑。陽鴻卒於雩都縣。友人沛國朱敬則。清河孟乾祚。范陽廬禹等。哀鴻抱德沒地。繼體未識。考行定諡。葬於舊城。鴻字季翔。平息人也。其先著族。右北平郡。大父陽真宰。適茲樂土。爰定我居。維桑與梓。既重世矣。鴻倜儻奇傑。環瑋博達。貫涉六籍。百家之言。其要在霸王大略。奇正大旨。君親大義。忠孝大節而已。章句之徒。不之視也。嘗陋漢史地里志。周禮職方志。時異虛記。心不厭焉。乃攀恆岱。浮洞庭。窺河源。踐岷衡。稽四海之風俗。算九州之險易。與趙國貫高。圖獻其議。遇火焚盪。天下壯其志而痛其事。養徒閭里。不應賓辟。儀鳳中。河北大使薛公舉鴻行勵貪鄙。天子嘉之。用寘于吏。乃尉汲曲阿。主簿龍門雩都。夫其屏居十年。一方化德。歷佐四邑。諸侯觀政。惜乎有大才無貴仕命也。初鴻遊太學。有書生山東李思言。物故南館。鴻傷其終遠家屬。有喪無主。乃躬駕柩車。送歸東土。及在曲阿。敬業作難。潤州藉鴻得人。歷旬堅守。城既陷而猶鬪。力雖屈而蹈節。寇義而脫之。因僞加朝散大夫。卽署曲阿令。鴻貞而不諛。詭應求伸。既入邑。則焚服闋門。而設拒矣。故得殿邦奮旅。一境賴存。淮海底績。答勳報公。卒不言賞。賞亦不及。君子以爲急友成哀。高義也。臨危抗節。秉禮也。矯寇違禍。明智也。保邑匡勳。近仁也。義以利物。智以周身。禮以和衆。仁以安人。道有五常。鴻擅其四。武有七德。鴻兼其二。大慮克就之謂貞。好兼自克之謂節。粵



若夫子可證爲貞節也已於是紀名垂迹表墓勒石其詞曰  
倬良士。縱自天。辨方物。覈山川。厥志大哉。峻剛節。殷義聲。返旅榭。晏窮城。厥德邁哉。哀斯人。命莫贖。德不  
朽。溫如玉。軌來世哉。



# 張燕公集卷二十二

## 墓誌銘

### 府君墓誌

府君諱鷟。字成鷟。姓張氏。其先晉人也。晉分家。世相韓。韓滅。留侯爲漢謀主。至字。爲范陽太守。因居其郡。及華。博物。亞聖。爲晉司空。君司空十二代孫也。曾祖諱俊。河東從事。大父諱弋。字嵩之。通道館學士。考諱恪。未仕卽世。先君四代早孤。單門。覺立宗祀之不絕如綫。府君襁褓。衰麻。鞠育舅氏。而炳太和之純。嘏爍。遠慶之洪胤。庇身禮樂。發言忠信。小無不誠。大無不慎。終日乾乾。遠于悔悛。靈根顛而還植。祖德墜而復振。加以好學不倦。聞一反三道機。元鍵。罔不幽探。外王父大理丞某。重世爲士。君傳其憲章。博施精理。年十九。明法擢第。解褐饒陽尉。丁王母憂。去職。夫人少而守義。老而無子。因心創巨。事不忍言。喪記之數。加人一等。服闋。調長子尉。換介休主簿。洪洞丞。太夫人在堂。官求使近。故累徙而不進也。內清淨以化人。外平反以悅親。不樂歸美。而善隱德。故下車無赫赫之聲。所去有遺愛之戀。有命差覆。囚山南。輜軒所歷。全濟甚衆。君以律有違經背禮。著妨難十九篇。書奏。帝下有司而刪定之。官黨同妬異。竟寢其議。道之將廢也。與命也。臧倉其如命何。調露元年秋。奉使晉陽。遇疾輦歸。藥禱無降。冬十二月大漸。九日乙卯。棄背於縣廨。春秋五十有二。光珪說不天。總角在疚。明年春。奉輜藁。殯於河東。賴夫人撫養孤藐。躬加訓授。男集

文雅。女工組繡。姻不失親。官復其舊。景龍元年秋。封長樂縣太君。夫人故藍田承威之女也。享年七十有  
二。是歲十一月戊申。傾背於東都康俗里第。於戲哀哉。靡瞻靡依。何怙何恃。二年七月己酉。克葬我先公。  
夫人合祔焉。從周制也。初議葬。小子夢度景於萬安山南。孤堆東峯之下。時淮南宏公相地曰。是山爲華。  
蓋崗爲蟠龍。龍者大人之德。孤者王侯之稱。卜夢協兆。何善如之。乃定墳塋。翬宅茲所。小子銜恤。誌之幽  
礎。銘曰。

欽若古訓。時惟皇考。翁和三光。希聖二老。清有世業。儉爲身寶。彌綸典憲。思緝王道。佐彼四邑。人用不擾。  
生我曷後。棄我曷早。閔余髻髮。遭家不造。鳴鳩在桑。其子在棘。母氏聖善。示我顯德。命服天朝。封邑舊國。  
榮未卒歲。哀已匝域。泣血思親。昊天罔極。孤之華蓋。土龍蟠連。崗四繞帶。林巒朝日。吐耀遠峯。攢微風夕。  
發過蕙蘭。石室固護。泉火寒衆。靈幽謁奉。神歡壽宮。深靜永閑。安。

唐故左庶子贈幽州都督元府君墓誌銘

維開元十年正月己未。左庶子武陵公河南元公。薨於東京留守之內館。公諱景懷。字某。魏武陵王雄之  
曾孫。右衛大將軍冑之孫。贈麟州刺史仁惠之季子。昔天啓水行。君臨寰海。雄圖長發。本枝碩茂。濟美象  
賢。餘慶不隕。公受茲介祉。誕膺淑靈。幼有純至之節。長立公直之操。學綜郡藝。詞擅精微。夫其結言以信。  
導物以德。清儉足以軌俗。貞厲足以矯邪。故美暢於中。名揚於外。弱冠以國子進士高第。補相王府典籤。  
藩邸擇賢。妙盡時選。尋以內憂去職。重補相王府參軍。及明兩昇儲。作貞萬國。以宮臣除太子通事舍人。

後歷官至右司員外。太子舍人。天授中以親累除名。向逾一紀。後除直羅溫縣二令。雖大位未享。通材必  
又。初自太府主簿。累入副卿。河南掾曹克昇。亞尹握蘭。右轄綱紀。南宮秉茲憲簡。肅彼專席。再侍儲華。卒  
踐宮相。公執心好直。履法斷恩。觸雷霆而除惡。不避也。枉絲髮而干譽。不爲也。升降兩宮。出入三代。克慎  
其始。終厥有成。君子以爲難。允哉其難矣。及啓手歸全。遺言薄葬。家無長物。士服其清。年過懸輿。人傷其  
天。嗚呼哀哉。贈都督幽州諸軍事。幽州刺史。賻悼之節。優於恆數。明年二月。歸葬於咸陽之舊塋。夫人韋  
氏。祔焉。禮也。夫人卽逍遙公敬遠之元孫。左常侍希仲之叔妹。淑行無徵。華年早世。其孤彥冲等。克遵遺  
訓。靡所寘哀。說情睦外。姻懷深國。士旣闕西階之奠。遠投東武之詞。銘曰。

卓彼英運。慶靈旣長。貽訓夫子。體微知章。在藝斯博。於欲則少。徒文其中。莫飾其表。惟靜惟默。不激不矯。  
時經三代。官成兩宮。化若風偃。德如澤融。邦稱其直。朝哀其忠。禮祔周兆。墳瞻漢宮。哀哀純孝。長訴旻穹。  
周故通道館學士張府君墓誌銘

君諱弋。字嵩之。范陽方城人也。其先張仲以孝友佐周。子孫醜周。任晉相韓。至留侯。報韓讎。秦興。劉滅項。  
爲漢世家。九代。及于漢亂。居燕四葉。爲晉司空。混一天下。司空生禕。避胡過江。六世至太常。而復寓于河  
東之族人。君卽太常卿隆之曾孫。徵君子犯之孫。河東從事俊之子。性倜儻。尙氣節。能引弓六鈞。命中百  
步。車服出入。擬於封君。州里頗患之。君乃勵操強學。不出門者十餘年。深道觀奧。鬱爲淵藪。周武帝聞之。  
徵爲通道館學士。旣入隋。而其國高尚厥志。終於山廬。嘗言夷齊清者非達。伯鸞曠者非中。優哉游哉。

吾不與也。夫人某氏少而嫠居，長而喪子，流離世故，窮盡難危，提携女姓，託身禪宇，實有高行之烈，隱居之風，未遑歸葬，有志不就，遺恨終天。降及曾孫，追由情禮。景龍三年歲次己酉十月十六日，克葬曾王父曾王母於河東之普救原，成先志也。銘曰：

皇矣烈祖，才雄氣武，不值漢高，空思萬戶。一旦折節，十年學古，高步華光，飛纓書府。昔有周處，斬蛟契虎，易暴以儒，異代同知。周命旣沒，鼎遷于隋，仕於二姓，君子不爲，昭昭盛德，百代之規。

唐處士張府君墓誌銘

府君諱恪，其先晉人。晉有張老，韓有開地，漢有留侯，侯八代孫皓爲司空。司空子字爲北平太守，遭漢亂，離家于范陽。至元孫華，復爲晉司空，遇難，子孫南渡。其處者或寓於蒲坂，周齊間有歸者，因徙焉。君晉司空十一代孫也。曾祖徵，君諱子犯，祖河東郡從事諱俊，父通道，館學士諱弋，德音遺範，詳諸家牒。君孤紹單門，傍無兄弟，茁而不秀，未仕而卒，道未融於邦國，位未揚於王庭。故老之口浸遠，好事之書又闕。是後生不得聞焉。哀哉！嗣子晉州洪洞丞，騫襍褻麻，育於舅氏。夫人隴西董氏，常州長史雄之女也。早年守義，唯鞠一子，嚴而有檢，勤而善訓，成先人之丕烈，貽後嗣之積善。徵太夫人德，則張氏幾將墜焉。開耀元年十二月二十七日，終於鄜城縣世婦馮氏之別業。春秋七十有二。先君之違世也，太夫人在堂，大門在殯，日月逾邁，有志未從。是諸孫疾焉，若履淵谷，以景龍三年歲次己酉冬十月二十六日，克葬王父王母於蒲坂東司空之村，成先志也。銘曰：

綿綿王父。續我靈基。幼而植德。人莫知之。烈烈王母。克明克類。教成嚮子。光我族嗣。中條之北。大河之東。邱陵桑梓。鬱鬱崇崇。千年啓室。百歲來同。永惟先志。欽成厥終。

### 中書令逍遙公墓

唐故中書令逍遙公韋氏諱嗣立。字延構。京兆杜陵人也。受渾元之正性。挺生人之秀傑。門爲孝悌之府。世處台衡之地。蓋士林之高標。宗臣之首出者也。生於秦之清水。長於鄭之成臯。聰明先覺。博古兼覽。究蓬山之百氏。綜闕里之六藝。文而不華。實而不滯。原夫志在於易。行在於禮。守橐籥之沖虛。播朱絃之愷悌。事有則而言有度。神無方而用無體。其與人也。溫良善誘。仁恕多容。俾夫頑蔽開析。愾驚擾從。君子進道。小人革慮。聞者願來。見者忘去。若膏澤之浸。陽和之感。萬物不知其化矣。及夫覆蕘登朝。濫觴宰邑。聖朝知其周慎。忠肅簡易。循良是以綢繆。兩禁重疊。千里迄踐。宰衡終厥有成。凡化二邑。理七郡。三入中書。再統兵部。選兵吏各兩冬。典樞密共五載。光弼四主。歷政三十有餘。其間累有謗及。官因左退。日月蝕而更明。隨和幽而不昧。爾其爲邦設教。遵德閑邪。身勤心苦。誠感物化。禮讓興於私室。刑罰廢於公家。衡鏡高懸。文武矯首。才無我失。善若己有。風流名教。作法垂後。訐謗皇極。功格天地。茫茫蠢蠢。旣生旣遂。四夷來王。五靈皆至。然而外榮中素。迹邇心遐。杳然朱戶之若喪。邈矣赤松之可接。西宴驪山之谷。東息龍池之野。擇逍遙而建號。列土宇而開祀。卽明主封立帝之謀。表高臣之志也。公考侍中。爲國元輔。公兄承慶。當代齊名。咸以令德。繼和金鼎。扶陽二相。陳氏三君。復追美矣。侍中前夫人崔氏。生黃門而卽世。後夫人

王氏生公而偏愛。公克諧以孝。因心則友。啓均養之德。成無間之言。天下之人。比之祥覽。惟公德行言語。文學政事。四者實總而兼之。事親養志而能爭。居喪過哀而顧禮。此善中之善者也。善人天之經也。國之寶也。道將興廢。木鐸之用有時。命或推移。蒼生之望恆在。春秋六十有六。遘疾陳郡。還醫洛師。開元七年九月二日。薨於歸德里。有詔贈兵部尚書。諡曰孝禮也。明年某月葬於某地。有子孚。恆齊。夫。儻然在疚。靡所寘哀。以某忝縉雲之舊寮。清風之餘論。入難名之闕域。窺妙德之形容。見託銘誌。庶傳精爽。至於歷官次序。平居事業。當見郡府遺愛之碑。國史名臣之傳。故不存焉。銘曰。

義義仁公。抱孝含忠。文獻則足。高明有融。翻飛王佐。穆我清風。道濟明時。心樂幽地。薜衣華袞。坦然一致。逍遙啓封。帶礪傳祀。生涯共盡。振古其常。人秉三德。天歸百祥。臧孫有後。公業不亡。

岐州刺史平泉男陸君墓誌

開元十三年十一月六日。故岐州刺史平泉男陸公卒于京師。十四年冬十月。葬于鄴西之先塋。公諱伯玉。字某。河南人。識真之士也。夫譽其克家。光乎觀國。篤慈惠以宰邑。宏雅量以執憲。擅華妙於禮闈。敷文敏於禁掖。推直方以獨坐。率簡易以專誠。所居而美風振。所蒞而德聲溢。非德充於內。而美形于外者乎。若夫孝盡愛敬之衷。悌包友順之節。仁協返身之恕。義適成物之和。四者禮之善物歟。吾友嘗從事於斯矣。然而舉禮之綱。持心之柄。靜則樂先王之道。動則濟賢人之業。位不盈量。年無登壽之才也。之命也。復焉可而言哉。銘曰。



陸侯泉妙體曠心古龍章炳文鱗角藏武囊籥冲用詩書義府移孝則忠安親合主乃建侯社乃牧王畿有巖有翼有長有威汲直謝病秦和不醫乞言未老啓手全歸石鼓東臨銅臺西望別業宛在舊塋增創弱子攀車孀妻送葬風景飄忽山川惆悵令德可傳浮生匪重神去一息刑遣萬種露往草陳霜來樹拱仁兮一義長蕪沒於邱隴

恆州刺史張府君墓誌

君諱承休字某吳郡吳人也留侯興漢播美西京長沙徙吳蔽蔓東土曾祖冲在陳爲文帝師入隋爲漢王學士祖後胤授經太宗尊之以爲祭酒旣封新野又贈以宗伯考少師位不充量止於朱陽宰班固稱世名忠孝魏武謂積善之家昌門一系暉我諸族君受天戩穀傳家業藝希言敦行去華崇實非法不由非禮不動精於物理敏於政事初以南郊齋郎補兗州兵曹丁太夫人憂廬墓三年加人一等再任始州司倉應入科舉改鄭州錄事參軍又舉賢良方正遷揚州司錄參軍移蘇州常熟令歷政皆有能名加朝散大夫入爲司農丞實掌錢穀姦僦息望使覆囚嶺南是司獄訟聽折惟允迴授濟源令風行畿甸河潤洛師加朝議大夫上柱國拜降州司馬轉恆州長史簡而有禮權而有中道嬰風恙去職就醫還京春秋六十有二終於頽政里夫人成紀郡君天水秦氏廬陵郡公行師之孫嗣公遊福之女敬事君子訓成諸孤當代之孟母也年六十二終於許州開元九年十月某日合葬於武功之禮讓原禮也夫道大難合仕屯而不進德高有後身沒而福流君同生八人半服銀艾祚胤五子率爲珪璋比跡於燉煌六龍南鄭千

室德門濟美信有徵乎懼陵谷或遷乃勒銘沉石銘曰

思文留侯時惟皇祖長沙南守分幹東土家有道書門傳學府嵬峩重世通經二主誕靈上哲克廣斯文造次仁義優游典墳孝乎事親忠乎事君猗那叔父亦足有云

贈潘州刺史馮君墓誌

公諱君衡字正平廣管高州人也昔畢萬苗裔邑于馮城因以爲氏其適越者則袁宏過江錄所載長樂馮祖恩之後也遠居僻地代爲右族帶甲千人擬四豪之公子田洞百里齊萬戶之封君祖盎持節總管高州都督耿國公葬贈左驍衛大將軍荊州大都督恩命分府爲三州授君之三子子智戮高州刺史子智玳恩州刺史猶子子游潘州刺史公荊州之孫恩州之子量包山海氣逸風雲陰德以濟物力行以求道散岸從心乘化而沒斯實一方超邁全真之士也夫人南海郡太夫人麥氏誕嫗勳門作嬪傑室初執冀妻之禮終抗梁室之行卽大將軍宿國猛公鐵杖之曾孫女也夫人有三子一女同歸上京長子元璠左衛中候次子元珪左領軍衛郎將少子力士右監門衛大將軍以將軍少養於高氏故舉家從其姓焉夫德厚者福長先否者終泰天之報應豈虛也哉大將軍所以雲漢奮飛忠孝至感迎聖善於炎海展三牲之色養拔友于於荒徼會四鳥之嚶鳴縉紳美談簪紱傾慕是知敬仲羈旅將育于齊孟軻儒藝成名此母信瑰才之特達亦餘慶之助成乎夫人享年八十有七開元十七年五月十二日薨於西京來庭里粵以八月二十二日安厝于長樂原之新城憫將軍之純至嘉先士之晦名恩詔追贈潘州刺史招魂而

合葬焉。蓋殊常之禮。若夫慈以遺後。孝以揚親。忠能合聖。惠足昭仁。嗟乎。馮氏之子。具此四德。鏤石垂文。爲不朽矣。銘曰。

潘州遠世。滅跡沉彩。詔贈本邦。光燦南海。其孤永慕。昊天不逮。夫人處順。奄背榮胤。悲離兩鄉。魂合雙楸。孝心可贈。百年匪悛。天日蒼蒼。邱隴茫茫。地名長樂。人樂無長。郭門之外。愁生白楊。

贈郎將葛君墓誌

公諱威德。字某。葛氏。本梁國寧陵人也。因遷徙。今居京兆注陽縣。父寶未仕。早世。公室無陶白之資。朝無金張之援。不受過庭之訓。不漸鼓篋之術。而能奮飛喬木。獨拔深濟。富忠孝而由己。善射馭而聞天。早以武藝妙選供奉。每扈遊別館。侍蹕禁林。何嘗不左發五紆。傍連雙兔。歲久拜元城府左果毅都尉。尋加上柱國。人陪內仗。思馬斯才。出典外軍。握兵之要。所謂白珪特達。青雲自致者也。其用未展。其生有涯。神功二年某月日。終於東都私第。殯北邙山之原。夫人太原郡太夫人郭氏。從夫有禮。以子而貴。開元八年十一月。薨于京師之修真里。有子福順。克家用孝。開國推忠。泣風樹之無追。痛榮祿之不逮。哀戚之情。上感飾終之澤。下流窀穸有期。祖奠將設。有詔贈右驍衛郎將。開元九年二月七日。合葬於長安縣龍首鄉禮也。鬱鬱宰樹。蒼蒼墓田。恐佳城之見日。祕銘石於重泉。詞曰。

都尉武達。夫人禮封。令德高行。譽偶名雙。自古迄今。仁賢同盡。唯傳忠孝。餘慶不泯。



# 張燕公集卷二十三

## 墓誌銘

### 四門助教尹先生墓誌

先生諱守貞。天水冀人。蓋好學博古者也。本乎官族。稱爲尹氏。昔有尹佚。司周太史。暨乃吉甫。勤於宣王。格言大勳。布在詩傳。遠祖緯。魏僕射。曾祖欣。隋開府。大父珍。唐棣州蒲臺令。父文。唐通州三岡令。先生積德餘慶。天錫純嘏。愿而克恭。情與禮合。七歲誦三雅。能通書契。訓詁之義。識草木鳥獸之名。十五誦三禮。能明君臣父子之道。定郊廟吉凶之制。二十誦春秋尙書。能精五行九疇之數。斷褒貶會盟之節。二十五誦詩及易。能辯正雅頌之始。極變化生生之至。又能誦古史百家之書。善文章草隸之則。恥夫流俗背實嚮聲。飾華褻末。故每外和內厲。元元本本。學者如斯。不舍晝夜。垂拱四年。以明經高第。遂授大成。自延載之後。條限賓薦。長安之初。大開貢舉。考功是歲。千五百餘人。召先生課。覈淑慝。時稱無滯學矣。天子聞其進通經術。乃下制曰。成均大成。尹守貞業隆時習。功宣日就。既有勵於分陰。俾參榮於丈席。可四門助教。洗洗青衿。有所仰矣。長安二年六月十日晝寢。忽夢麟臺兩局。爭召修文。覺而歎曰。十二日稷。吾當往矣。因命親族序訣。至日安枕俟期。俄然而卒。春秋四十。可謂古之達化知命者也。嗚呼。天與之德。而不永其年。天與之才。而不大其位。何乎。粵七月十七日。葬於高陽原。先君之舊塋。銘曰。

尹氏之子。其殆庶幾爲仁。由己三月不違。謙成德柄。學也身基。辟雍洋洋。可以療飢。環林之下。可以棲遲。我實道貴。人言位微。修文地下。前哲同歸。子之知命。將歿先期。朝衣束首。精魄高飛。人之云亡。胡不悽而高陽之原。有隄其側。郭門直視。松柏一色。邱隴纍纍。阡陌誰識。浮焉休焉。爲我心恻。

元州司戶上柱國呂君墓誌

公諱虔。字某。其先東平人也。堯之太嶽。始封呂侯。周之太師。實表齊國。河西則霸王繼代。關東則丞相聯華。近徙河間。是稱右族。大父贇。隋幽州都督府長史。考師。滄州青池令。並振羽儀。馳聲郡邑。公孝悌天至。禮樂混成。千里聞騏驥之才。五都重琅玕之價。壯士行去。樹勳於塞垣。君子居之。何陋於蕃郡。以上柱國。爲元州司戶參軍。積善襲於家風。餘慶流於身後。享年若干而卒。夫人河清縣太君傅氏。四德爰備。六行聿修。始則賓於冀妻。終乃訓成孟母。春秋若干而終。開元十四年某月。合葬於州城西南里之平原。禮也。我有令子。職司馬於小山。我有淑孫。偶乘龍於大樹。榮哀之事。于茲畢矣。銘曰。

堂堂呂公。休有令德。穆穆傅母。順我內則。兩譽齊振。雙儀不忒。景行山東。風流河北。有生必謝。誰能獨存。神寧故里。合葬平原。劍暗泉室。松寒墓門。勒銘沉礎。萬古何言。

徐氏子墓誌

徐氏子者。名巖。字某。司封員外郎堅之第四子也。驥子睨雲。鳳毛洗日。孝友因性。聰敏若神。置在膝前。已會星辰之氣。戲於牀下。能記賓主之詞。及總角成童。精意好學。聞一知十。升堂視奧。下筆成章。而倫嬰發。

言爲論而卓詭。識者咸謂增世構之崇蘊。益源流之洪潤。雖甘茂之孫。十二飛辯。班彪之子。九歲能文。不尙之也。天乎何辜。顏傾無命。年十有三歲。大足元年九月。遭疾而沒。嗚呼哀哉。瑠月始生。不見其盈。瓊枝方秀。不見其茂。悲哉銘曰。

生日何淺。死路何深。珠碎朧月。花殘稚林。哀哀父母。孰處其心。

鳳閣尹舍人墓誌銘

峩峩尹氏。太古之始。發源堯師。中葉周卿。爰暨初考。咸有頌聲。猗歟府君。代烈增盛。孝行之本。謙德之柄。耽樂道真。含光無競。三典郡土。五刑以正。再司府丞。百工興詠。茫茫大造。物生遂性。虛無宰之。孰能力爭。倬良士。縱自天。辦方物。覈山川。厥志大哉。峻剛節。殷義聲。返旅襯。晏窮城。厥德邁哉。哀斯人。命莫贖。德不朽。溫如玉。軌來世哉。

唐故處士河南元公之碣銘

嗟我處士。煥炳其文。精微天象。輿道爲隣。頽乎萬化。于三十春。在昔薄葬。時服幅巾。厥孤克孝。永懷遷神。君其心之。無違返真。乃建豐碣。追揚茂廡。王門公路。豈微朱輪。天才海學。于何窶貧。心焉有主。孰矧我艱。烈烈皇考。求仁得仁。哀哀王母。斯恩斯勤。李虔報養。王褒感親。退居更命。喪禮終身。忠爲令德。孝實至純。一門二喜。千載不泯。

平偃師碑尾

粵以長壽二年十月十七日。改窆於衛縣苑樓之西北原。夫令德所庥。餘慶未也。神龍紀厯。皇運中興。天子嚴祀清廟。緬懷前哲。乃下制曰。朝議大夫。守衛王府司馬。上柱國。平原。晉父。故偃師令某。公門襲慶。士林成則。名教羽儀。道德泉藪。輔仁宜國。早謝昌辰。積善洋溢。垂休茂胤。時光祀夏。慶屬配天。錫類之恩。俾覃於卿士。哀榮之典。宜旌於泉路。可贈蒲州長史。君子謂成其子而植乎身。義方也。愛其臣而及其祖。孝理也。孝以行惠。惠以察忠。義以立慈。慈以昭順。君臣父子之是型焉。

唐故涼州長史元君石柱銘并序

公諱仁惠。字某。河南洛陽人也。昔帝軒命子。爰宅幽都。天神降祚。遂荒北嶽。其後日月運行。雲雷經始。壇場鄴洛。據天地之圖。帶礪山河。建王侯之國。公魏昭成皇帝之十世孫。中書令濮陽王順之曾孫也。大父雒魏濮陽王。改封武陵王。昆吾伯嗣。越在濮陽之墟。瑯琊王子。別封武陵之郡。宇文朝降。爲武陵公。太府卿。秦州總管。微子去國。不替舊章。薛侯來朝。於焉降等。父冑。隋濠豫二州刺史。右衛大將軍。襲封武陵公。翼亮隋室。宏濟王業。有佐命之元勳。承異朝之世祿。文武籍甚。貽燕深長。公受金行之正性。承冠世之隆烈。幼見岐嶷。夙聞聲器。靈臺雲秀。繩墨之宰。無施雅韻。天成金石之師。何力。屬隋綱弛。紊神棄不歆。卿族衣冠。日失其序。獨寐寤宿。永懷繁澗之人。藏器待時。未射高墉之隼。唐高祖龍飛天宇。鶴版巖林。授公右千牛錄事。曩開之恩。舊也。高皇邑子。旣與盧綰同衣。世祖學徒。則有嚴陵共宿。久之。以公事免。爲蕪州法曹。又歷循州河源滑州靈昌二縣令。克己爲政。蠻貊化忠。信之言直。道與人仕。已無喜懼之色。永徽在暨。



石真構難。羣兇既剪。江界蕭條。帝念疲屯。疇茲俾乂。乃授公睦州雒山縣令。乘駟而往。下車作則。江浦海盜革面來威。然後開網鳩人。峻策羈吏。閑田盡闢。鰥寡委犬彘之餘。絕澗無遊。豪猾屏蠶漁之氣。我有禮樂。達於山川。鬼神應物。休禎孚於鳥獸。草木朝廷異之。拜朝散大夫。行隆州閬中令。未至。政授雍州渭南令。觀人設教。異邑同風。遷隆州司馬。尋加朝散大夫。守涼州都督府長史。分乘兩蕃。人康頌作。化澄巴濮。無侵橘柚之園。教溢河湟。不飲蒲萄之酒。離歌就晷。歲夢臨辰。命蹟修途。榮慙厚德。總章二年。終於官舍。春秋七十有三。夫人安定梁氏。文伯之妻。君子以爲知禮。孟軻之母。良史稱其能賢。齊德茂於昭塗。合禱期於幽隧。有子懷貞。斧藻詩禮。佩踐義方。承家有馥。芝蘭如也。歷官右司員外郎。太子舍人。而罹事徙居。復歸舊土。履霜露於三紀。無改素冠之行。違桑梓於十載。還守青門之田。勤孝在乎追遠。豐感思乎備物。武陵公之塋域。今順陵柏城之內也。山園有禁。奉瞻靡及。粵以聖厯二年。歲次月朔。別卜宅於咸陽縣肺浮原。合葬焉。公孝友純深。風標峻起。門無雜客。家有嚴君。而佐郡爲邦。宏風邁德。執法不撓。去邪勿疑。仲由之政事。叔向之遺直。豈稱論之典。有闕範則之容。將墜。仰惟代姻。恭承哀託。郭有道之故事。無媿蔡邕。趙文子之將遊。永懷隨會。寓詞楹石。式題賢壠。其銘曰。

大哉乾元。我族資始。有國伊魏。曰天之子。皇義姓風。帝姬氏水。勗業垂統。鬱乎舊史。崇德象賢。允也重軌。貞涵玉性。潤結璣源。武公之子。平王之孫。川流長直。光氣能渾。孝深柏穎。義重荆潘。白圭比節。黃金敵言。行實剛簡。游無詔黷。學妙神教。書能鬼哭。避彼屯連。盤桓空谷。四海有王。一旦明月。佩此芳草。遷于喬木。

亦既從政。淑問克宣。秉心如水。臨事如弦。歷宰四邑。高芬屬天。元僚兩郡。汪化流泉。江河秦蜀。嘉聲在焉。三光西沒。百川東渡。天道運迴。人隨代故。倏忽三紀。悲涼千露。帝葬橋山。傍壙祖墓。天斷舊域。地開新路。路卽咸陽。阡惟京兆。地氣雲矗。長岡龍抱。竊揜銅人。瑩留石鳥。塵歇徑滅。山飛海少。篆刻揚名。亭亭華表。子曲阿令墓銘

存爲神鑑。歿爲國殤。惟呂惟子。同歸義方。  
司屬主簿博陵崔訥妻劉氏墓誌

夫人劉氏。其先彭城人也。隋毗陵郡通守子將之曾孫。唐滁州刺史德祖之孫。汾州刺史延嗣之女也。昔武子處秦。厥初令氏。元王國楚。是焉昌族。盛德之門。龍驥接彩。世祿之胄。龜虎聯華。夫人璇室。載蘭蕙林。增秀啾啾。黃鳥豔豔。清月聞詩。聞禮竊比。諸生茂行。淵心實稱。士女及鳳。飛啓絲。夫婦盡琴瑟之和。雞鳴咸纏。舅姑移喬梓之敬。友愛洽乎。如嬪任恤。周乎姻戚。豈惟禮備。澄幕工深。機杼固已能循法度。宜其室家矣。年若干。以大足元年七月某日。寢疾而卒。粵二十九日某辰。假葬於某里。夫國喪賢嬪。家亡淑媛。母氏垂白。殯奪所懷。稚子始孩。子焉無倚。嗚呼。天道輔仁。人道與順。眷茲七德。不遐三壽。何哉。報應之理。豈神食其言。修短之期。將事歸於命。外姻畢萃。累歎不足。夫人卽吾姨也。今薄譏素履。永刊幽石。圖史之外。有美存焉。其銘曰。

崔實齊胄。劉亦漢宗。崇其顯媾。望偶族雙。闔闈是穆。饋奠斯恭。貞歌浮漢。孝室洞江。珪璋其節。桃李其容。

宜享偕老。胡寧鞠凶。朝槿飛陌。春羅墜松。夫傷子慕。去此何從。百歲之後。魂兮合封。

文昌左丞陸公墓誌

公諱元方。字希仲。蘇州吳縣人也。帝興惟二。虞盡美於南風。強國有七。齊莫大於東海。元侯制食。因而爲宗。丞相冊勳。開吳佐命。盛德之後。瑤琨代襲。故丹青奕世。三君之望。並高金玉聯華。五常之目。齊重公卽陳給事黃門侍郎琛之曾孫。唐荊州當陽縣丞山仁之孫。司儀郎東之姪。豫章尉元之之子。體元黃之純粹。峻清白之隆名。鵬翼載軒。騏鳴自遠。始以司成明經。業優擢第。補三水扶風渭南三縣尉。授裏行監察殿中三御史。遷鳳閣舍人。兼太子中舍。又判鳳閣。又守秋官。行鸞臺三字侍郎。同鳳閣鸞臺平章事。坐公事降爲綏州刺史。居無何。檢校春官。又試天官二侍郎。兼司尉卿。復除鸞臺侍郎。同鳳閣鸞臺平章事。轉右庶子。轉文昌左丞。前後掌選。及知考各二歲。九流銓總。代天理物。公執其衡鏡。而野無遺賢。三載考績。惟王舊典。公秩其幽明。而庶官咸事。斯平憲章。臺閣籍甚。人倫至於經濟大道。彌綸庶務。嘉猷削於隱德。宏益晦于推美。蓋不得而聞也。古人有言。進退在命。忠信在人。一出持州。再入莅政。汲長孺之方直。時守外臺。胡伯始之詳明。亟司中禁。抑有由焉。嗚呼。人之淑斯。宜享難老。昊天降戾。曾不愆遺。大足元年二月七日。寢疾而終。春秋六十有三。歷事兩宮。三十餘載。奉上惟敬。臨下惟誠。密勿兩終。靜而調理。心尙坦率。不違名教之地。迹列軒裳。不雜風塵之伍。施與忘倦。鄉黨穆焉。夷險若一。朋友義焉。所謂終溫且惠。行同歸於大雅。克已復禮。身不離於令名。及東首歸全。西階徹奠。無食粟之馬。無衣帛之妾。知與不知。莫不嘉

歎。粵三月十四日。假葬於國門之南費村。永刊昭烈。垂之幽礎。

節愍太子妃楊氏墓誌

開元十有七年二月癸未。中宗節愍太子妃楊氏。薨於京師太平里第之內寢。越五月丙申。詔葬於新豐之細柳原。黃陵不從。古之道也。嗚呼哀哉。妃氏之先。代居河華。赤泉啓國。清白傳家。東都之公胄。西京之後族。高祖士達。隋開府納言。天授中以孝明高后之父。追封鄭王。贈太尉。曾祖緘。隋符璽郎。抗節王充。朝廷旌載。贈靈州刺史。祖全節。左內率。贈魏州刺史。考知慶。千牛豹韜。二將軍。若夫軒冕王官。同許史之繁。漢婚媾帝室。比姜媯之宜周。是教二華降靈。五河飛譽。拜玉冊於文廟。儷金鑿於青宮。八參視膳之儀。出友元真之樂。禮陪繭館。祭服始於北郊。詩贊鵲巢。王化終於南國。豈知言違鬪水。神往邛山。七日之望。不歸。千秋之言何及。於是視身知苦。幽探白馬之偁。覺心等空。坐證青蓮之葉。久以喬木無枯。柏舟早誓。棣華先落。聖善相依。闔門正家。稱未亡而全禮。高堂終養。不深哀而遂絕。此又禮外之禮。孝中之孝者也。初上在東宮時。妃有女弟。選爲良媛。生忠王。卜者曰。不宜養。爰自襁褓。命舉妃字。及開元正位。良媛爲嬪。而卒。妃之視忠王也。隱觀之。訓誨之。竭從母之仁慈。倍猶子之珍愛。忠王之託妃也。敬愛焉。聽順焉。生盡因心之樂。沒過如母之感。且夫慈懋鞠育。孝思顧復。仁叶恩親。愛備恭睦。成天下之百行。致生人之五福。斯蓋皇極之端。國風之首者矣。湖陽王當小宗之祭。元妃之喪。故喪挾兩姑。而祭殷二國。何必鼓吹山上。遙傳慈母之名。石闕廟中。獨立少姨之像。史官承詔。勒銘沉碧。詞曰。

太華北足。長河東肘。總粹陰靈。妃德儲后。鳴美玉佩。炯光金鈕。嬪貴長姨。寵王從母。永訣上賓。死孝哀親。顧懷孺子。忍則天人。昔貞萬國。今撫百神。泉燈我夜。宮樹他春。陵麥秀兮。漸漸隴月生兮。纖纖。霜岸去兮。無還日。青門絕兮。不可瞻。石獸澀兮。綠苔黏。宿草殘兮。白露沾。園寢閉兮。脂粉膩。不知何人兮。開鏡奩。



# 張燕公集卷二十四

## 墓誌銘

### 滎陽夫人鄭氏墓誌銘

夫人諱某。字某。滎陽開封鄭氏之女也。有唐銀青光祿大夫。行少詹事。博陵侯崔氏之妻。中大夫。中書舍人。滉之母也。高祖述祖。北齊禮部尚書。太子太保。滎陽平簡公。曾祖武叔。北齊洛州刺史。中牟公。祖道。援隋宋城令。父世基。故吉陽令。故左僕射。安吉公。杜淹。太夫人之外王父也。夫人家世德門。母氏鼎胄。衣冠禮樂。耳目所徵。號之諸生。實爲女士。先夫人以崔出。泰岳之允。鄭祖。周王之穆。長源修麓。北濬聯宗。故夫人年十有七。歸於我氏。盡敬愛以安舅姑。致友穆以諧娣姒。性寬恕。尙素雅。文而不奢。約而不陋。故邑號光啓。象服是宜。博陵侯更事兩朝。多歷官序。居必大理。去有遺愛。雖毳衣善聽。得非鷄鳴之弼乎。舍人及三弟。長安尉泌。藍田尉液。左千牛滌。咸有當代之名。立無過之地。滋液德教。琢磨禮範。雖趨庭善稟。得非闡門之誨乎。夫樂得好逑。關雎義也。鞠成衆子。鴈鳩仁也。采蘋采藻。修禮度也。如山如河。有德容也。婦禮旣成。內則用貞。母儀乃行。家道以寧。於是春秋高矣。雅好真諦。厭斲禪味。滅徹珍華。被服慈衣。捐斥文繡。總斯羣懿。式是六姻。故以嗣徽先姑。垂裕來史。詩所謂邦之媛也。夫人有焉。皇天難忱。不享偕老。年六十四。神龍元年十一月九日。遘疾終於洛陽之遵化里。其明年二月某日。葬于富平縣之某原。君侯傷神。諸

子銜恤。寘銘幽竈。用存終古。其詞曰。

東惟詹府。西望綸闈。吾夫鸚麟。吾子鷓飛。青綬赤芾。魚軒翟衣。喬梓灌墓。堂堂榮輝。如何不淑。奄永泉扉。漠漠元夜。容容白日。百歲之後。同乎此室。

右豹韜衛大將軍贈益州大都督汝陽公獨孤公燕郡夫人李氏墓誌銘

夫人諱某。字某。故代州東治府右勇毅都尉幽州高士李感之女也。本姓張。居於清河郡。大父元愨。官至安東大都護長史。與太宗有故。賜姓李氏。仕歷檀州司馬。始家薊城。是則帝寵舊臣。乃命王族。官平朔野。因爲郡人。偉哉孝友。清白之仁。基金鉤石印之靈慶。必將光大別族。繁衍淑女。彩黛粉敷。焜燿華美。若斯之盛也。夫人幼而韶異。長而婉穆。金聲玉澤。薤榮蘭茂。傳賢莊姜。詩美仲氏。無以尙也。初汝陽公夫人元氏。生一男四女而早卒。繼室以夫人。封諸燕郡。王元生立。及長孫楊氏二女。秉蠡斯宜爾之德。著鳴鳩均養之仁。色無偏和。心無殊厚。閨庭之內。邕邕如也。雖邑中五服之家。門下三千之客。莫能察其異焉。永寧里。先人之舊廬也。有通渠轉池。巨石嶽嶷。噴險淙灑。洄潭沉沉。殊聲異狀。而爲形勝遊衍之處者。十四五。前夫人之孫。蘇氏之婦。弱歲嬉而墮馬。舉家環流。憚莫能救。夫人投身赴水。或沉或浮。久之提挈僅免。其行已也。實多此類。府君更郎。將中郎。將各一將軍。大將軍。凡四。前後領左右羽林二軍。禁營。青海。鴨綠二道。總管。天子元老。白首兵欄。腹心爪牙。朝無與二。外受珣戈文馬之賞。內委金璣寶貝之飾。將軍旣殞於郛。曲夫人亦散於宗姻。可謂貴而好禮。富而能惠者已。及君子晨歌。夫人晝哭。喪有過戚。制無越禮。其後



法吏苛禮。余子遠遷窮荒一訣。倚閭三歲。炎山瘴海。曷云其來。施珍玩以奉佛。徹滋味以奉道。精意入冥。明神與直。中興昌麻。無廢舊勳。先公茂乎飭終。愛子榮乎起滯。天步方泰。家屯適夷。宜享南山之壽。奄頓西泉之駕。神龍元年十二月二十二日。寢疾終於洛陽之德懋里。春秋若干。國墜邦媛。宗傾母儀。孤允孝孫。哀纒棘。有詔旨曰。獨孤某妻亡。還京日。宜給靈輿并遞。悼舊褒德。矜孤恤喪。朝之大經者。粵以明年十一月二十日。卜葬於雍州之某原。不從先塋。古之道也。夫計功伐。勒鼎彝。非婦人之事。撰德行。存國史。亦孝子之志。乃爲銘曰。

倚嗟昌兮。月出之光。如葉莫莫。如華皇皇。宜啓燕郡。作合汝陽。尊之象服。錦衣裝裳。以慈行訓。曰仁之綱。以命易難。曰義之方。婦有柔德。亦惟其常。女之士行。于何是臧。彼天蒼蒼。胡降百殃。捨我媚子。捐其高堂。邱隴茫茫。風生白楊。象物皆盡。德音不忘。

上邽縣君李氏墓誌

夫人太祖景皇帝之元孫。西平郡王普定之女也。賦靈陰德。資性柔嘉。事舅姑盡其敬。與娣姒致其睦。茂行充乎內則。懿聲溢於外姻。雖幼育王家。長自傅保。而能謙光庶類。降心細物。手成朝祭之服。躬操酒食之品。凡婦人之所能事。而夫人莫不備焉。府君朱紱之歲也。於是乎始受封邑。象服盈門。魚軒在路。姬氏王者之後。夫人帝室之親。夫貴婦榮。於斯爲盛。及帷堂而哭。有敬姜之禮。擇鄰而處。有孟母之教。入閭俟信。有諸婦之期。出言成章。有衆女之誠。受命不淑。以某年月日。卒于同州之私第。以神龍元年十一月二

十日合葬于萬年縣白鹿之舊塋。有子遜。殿中侍御史。檢身承家。揚名爲孝。思我母氏。感秦伯之詩。祈于府君。取周公之禮。髣髴心迹。志之幽石。其銘曰。

茫茫萬性。朝宗于李。婺星分極。咸池派水。后稷裔孫。神貽女士。動遵法度。居觀圖史。輔佐哲夫。訓成賢子。宜崇徽號。以享介祉。高堂奄空。霜露方始。儉用禮節。葬非奢美。鏡下窆臺。衣緘泉筥。壙烟不散。松風長起。摘果人迷。侵林獸死。永言惟孝。事親終矣。

鄧國夫人墓誌銘

詩美莊姜。傳稱孟母。庶姬綿邈。千載時有。猗嗟邦媛。柔明亶厚。龜玉毀橫。膏蘭夭壽。遠矣皇祖。肇自伯宗。靈基在晉。華胄陵江。尹茲西楚。宅是南邦。高蓋結轍。圓冠比蹤。魏館虛待。周京長發。父對雄風。母膺姊月。珠浦瀆潤。玉林清越。昆弟三人。羽儀雙闕。家芳淑女。國茂賢妃。具瞻四德。旁通八徽。步幃馳辨。連環定機。調絃魚躍。弄杼鴛飛。禍后創業。軒宮多事。高行登聞。大家入侍。幽贊日月。財成天地。溫室不傳。平城盡秘。大君命我。變禮斷恩。衛妻空誓。息媯無言。均養七子。劬勞二門。始賦樛木。終歌采蘋。多難啓聖。羣凶搆孽。朋家作仇。脅權相滅。臨禍不懼。忘生蹈節。彼何人斯。碎此貞烈。氣消日朗。旣安且平。皇心震悼。禮備哀榮。啓國加等。復土陳兵。外姻來唁。中使臨塋。恭惟夫人。宿精智刃。昭昭開土。授之心印。古無合葬。遺言別墳。藥纒孝子。敢廢前聞。服不珍繡。盤無膩薰。室暗泉火。松殘隴雲。神合大化。誰爲小君。

李氏張夫人墓誌

臨淄李伯魚妻者。范陽張氏女。諱德。性孝悌柔婉。能日誦數千言。習禮明詩。達音妙繪。德言容功。蓋出乎天下。伯魚善爲文。擢校書郎。出爲青州司功而卒。夫人寡居無子。以歸宗焉。長安二年。年四十有八。傾逝於康俗里。殯於永通門外。景龍三年。家疾居貧。季弟說。鬻詞取給。冬十月。安厝伯姊於萬安山陽。蒼梧不從。古之制也。北望先隴。西接妹邱。明靈其嘉。永安此室。銜哀鼓誌。嗚呼孔懷。銘曰。送我伯姊。萬安之墳。精靈何處。爲雨爲雲。彼臨淄兮千里。望條忽兮夫君。

張氏女墓誌

女郎名琰。姓張氏。洪洞丞府君之少女也。聰慧孝友。蘇條鬢。誓能讀史書。善奏絲桐。舉族珍之。未成人而天命也。聖麻中。隨仲昆之任。殞折於慶州。歸殯於藍田別業。景龍年。屬家艱。季兄說。徵黃門侍郎。哀請不拜。詔許終服。家貧。備文以取資。冬十月。獲葬女弟於萬安山陽。差池姊塋。顧瞻尊闕。不亡孝弟。慰爾幽魂。含酸屬銘。投筆氣索。辭曰。

陟彼京兮。痛同生兮。奈何朝露。在薜榮兮。共天地之大德焉。早落而無成兮。

行狀

兵部尙書國公贈少保郭公行狀

公名震。字元振。本太原陽曲人也。大父任。相州湯陰令。因居於魏。公少倜儻。廓落有大志。儀冠雉。傑身長七尺。美鬚髯。十六入太學。與薛稷。趙彥昭同業。時有家僕。至寄錢四百千。以爲學糧。忽有一人。縷服叩門。

云五世未葬。棺柩各在一方。今欲齊舉大事。苦乏費用。聞君家信至。頗能相濟否。不問姓名。以車載去。一無所留。深爲趙薛所誚。公怡然曰。濟彼大事。亦何誚焉。十八擢進士第。其年判入高等。時輩皆以校書正字爲榮。公獨請外官。授梓州通泉尉。至縣。落拓不拘小節。嘗鑄錢掠良人財。以濟四方。海內同聲合氣。有至千萬者。則天聞其名。驛徵引見。語至夜。甚奇之。問蜀川之跡。對而不隱。令錄舊文。上古劍歌。其詞曰。君不見昆吾鐵冶飛炎烟。紅光紫氣俱赫然。良工鍛鍊凡幾日。鑄得寶劍名龍泉。龍泉顏色如霜雪。良工咨嗟嘆奇絕。琉璃玉匣吐蓮花。錯鏤金環生明月。正逢天下無風塵。幸且周防君子身。精光黯黯青蛇色。文章片片綠龜鱗。非直結交遊俠子。亦曾親近英雄人。那知中路遭棄捐。零落漂淪古獄邊。雖則沈埋無所用。猶能夜夜氣衝天。則天覽而佳之。令寫數十本。遍賜學士。李嶠閣朝隱等。遂授右武衛胄曹。右控鶴內供奉。尋遷奉宸監丞。屬吐蕃請和。親令報命。至境上。與贊普相見。宣國威命。責其翻覆。長揖不拜。瞋目視之。贊普曰。漢使多矣。無如公之誠信。遠近疆界。立談悉定。因遣金數十斤而還。公悉以進上。奏言。揣彼上下之情。人倦其絲役久矣。咸願早和大將。論欽陵。不爭四鎖。獨不欲耳。但國家每歲不絕其使。而欽陵常不稟命。自然彼落之人。怨欽陵日深。望國恩日甚。設欲廣舉兵徒。難矣。斯乃反間之微旨也。必可使其上下俱懷猜阻矣。則天甚然之。無何吐蕃君臣果相疑貳。遂誅欽陵弟贊婆及其兄子莽布支。並來降。公聲名籍盛。授御史。加朝散大夫。遷主客郎中。吐蕃與突厥連和。大入西河。破數十城。圍偪涼州。節度出城戰沒。蹂禾稼。米斗萬錢。則天方御洛城門。酺宴涼州使至。因輟樂。拜公爲涼州都督。兼隴右諸軍大使。調秦

中五萬人。號二十萬。以赴河西。公至涼州。吐蕃素聞威名。相謂曰。我贊普猶懼。吾輩何可敵乎。相率而去。公收合餘衆。繕修城壁。施法令。屯田一年而復。公之功也。公以涼州西據吐蕃。北有突厥。久示其弱。未揚天威。因徵隴右兵馬一百二十萬。號二百萬。集於湟州。營幕千里。舉烽號令。時宗楚客爲相。素與公不協。令人告變。則天惶懼。計無所出。狄仁傑魏元忠。韋安石。李嶠。宋璟。姚崇。趙彥昭。韋嗣立。張說。二十五人。抗表請保。如公有異圖。并請身死。籍沒。則天由是稍安。兵旣大集。人又知教。分兵十道齊進。過青海。幾至贊普牙帳。贊普屈膝請和。獻馬三千匹。金三萬斤。牛羊不可勝數。公大張軍威。受其蕃禮而還。旣伏西戎。震威北狄。突厥獻馬二千匹。所獲涼州人士。皆放歸塞上。從此方鎮肅清。蕃落畏慕。令行禁止。道不拾遺。凡所規模制作。率爲後法。河西隴右十餘處。置生祠堂。立碑頌德。閭立均等爲其文。尋有詔許入朝。公素無第宅。寄居友人之舍。候鼓入朝。忽有人馬前送狀。開緘前人已去。狀中唯有物數。而無姓名。便於樹下。獲騾馬二十餘匹。帛三千匹。公曰。豈非太學請葬之士乎。因以買宅居止。薛稷趙彥昭聞之。皆嗟嘆良久。景龍年中。宗楚客韋處訥等。潛結朋黨。憎功害能。授公驍騎大將軍。兼安西大都護。四鎮經略使。金山道大總管。時烏質勒久恃衆倨傲。不屈朝廷。縱兵遠掠。道路不通。公以衆寡不敵。難以力制。因率麾下數十騎。徑入部落。烏質勒大出兵衛出迎。望見公威容端毅。風鬣若神。不覺屈膝。因而下拜。公宣國威命。抗聲與語。自朝至暮。雪深尺餘。竟不移足。質勒頻拜伏。語畢歸帳。相去二十餘里。質勒久立雪中。倉卒疾發。是夜暴卒。其嗣子娑葛。集諸將曰。漢使殺我君父。今須復讎。大舉兵衆。將追殺公。聞質勒死。遲明素服來弔。道

路相逢。兵圍數匝。娑葛見公忽來。未之敢逼。但言衛護漢使。公至其帳下。大哭流涕。因撫定其嗣。蕃人大喜。留數十日。助其葬事。娑葛獻馬三千匹。牛羊十餘萬。移居千里。西域無事。道路肅清。諸蕃聞之。遣使歸降者十餘國。時人語之曰。郭元振詭殺烏質勒。知娑葛與闕賈有釁。奏請移於瓜州。制從之。會中書令宗楚客受金。遂寢其事。公具以狀聞。楚客恃勢。囑請召公。將陷之。公不從。又奏請斬楚客。清蕃落。時韋庶人竊弄國權。中宗竟不之省也。初安西南有毒河源。遠在葱嶺西北河岸百步。人畜踏之者輒死。公威振西域。所向無不從者。固驗圖經。知其源。率兵三萬人。歷于闐康居大食等十餘國。所過之國。令供資糧。仍畧其國主爲左右總管。率兵前進。北至葱嶺。牙帳前。十二國王兵百萬餘。其河源上有大樹。高千餘尺。垂陰數頃。大軍至日。有黃龍繞樹。以口吐毒氣。而拒官軍。三軍悉覩焉。公手書摻檄文。令左拾遺張宣抗聲讀之。畢。黃龍解樹而下。公率諸軍誅之。數日方倒。聚而焚焉。河源且絕。數十里內。悉爲良田。在安西十餘年。四鎮寧靜。韋庶人知政。屢徵不至。因下僞詔。令侍御史呂守素。中丞馮家賓。相繼巡邊。欲將害之。未及。皆爲娑葛等諸蕃刼殺之。睿宗卽位。徵拜太僕卿。勅至之日。舉家進發。安西士庶。諸蕃酋長。號哭數百里。或瘞面截耳。抗表請留。因紿之。而後卽路。其至玉門關也。去涼州八百里。河西諸州百姓蕃部落。聞公之至。貧者携壺漿。富者設供帳。聯綿七百里。不絕。公旌節下玉門關。百姓望之。宛轉叫呼。聲動岩谷。自朝至暮。傳呼至涼州。涼州城中。男女在衢路。並歌舞出城。咸言吾父至矣。通夜城門不受禁制。都督司馬逸客聞之。謂公近矣。陳兵出迎。會候騎至。云始入玉門關。都督嗟嘆良久。具狀聞。至京。同中書門下三品。加銀青。

光祿大夫遷兵部尚書封館陶縣男依舊知政事尋轉吏部尚書知選舉囑請不行大收草澤睿宗屢下詔褒美後默啜大寇邊拜刑部尚書充朔方道行軍大總管築豐安定遠等城以拒賊路尋加金紫光祿大夫再遷兵部尚書知政事仍舊元帥會太平公主竇懷貞潛結兇黨謀廢皇帝睿宗猶豫不決諸相皆阿諛順旨惟公廷爭不受詔及舉兵誅竇懷貞等宮城大亂睿宗步肅章門觀變諸相竄外省公獨登奉天門樓躬侍睿宗聞東宮兵至將欲投于樓下公親扶聖躬敦勸乃止及上卽位宿中書十四日獨知政事因下詔曰大臣立事夷險不易良相昇朝安危所繫兵部尚書同中書門下三品上柱國館陶縣開國伯元振偉才生代宏量匡時經綸文武今之王佐出入將相古之人傑夙侍宸扆疇咨廟堂思致堯舜以期管樂朕往在儲幃洎登寶位每觀其仗義感激頗制兇邪立誠慷慨密陳宏益爾其至矣朕實嘉之頃者梟獍興謀干戈作釁太上皇帝旣命朕除討元振又馳奉宸極始則贊予爲弼終則寧朕問安可謂格于皇天貫于白日元惡旣剪庶物惟新克昌是圖朕豈忘舊宜開井邑永誓山河可進封代國公賜實封四百戶物一千段子五品官尋兼御史大夫天下行軍大元帥是歲大徵兵衆閱武驪山兵一百萬號三百萬並奉公節度是日三令之後上將親鼓公慮有大變因略行禮上怒引坐纛下紫微令張說犯鱗而諫上乃曰元振有保護大功宜寬軍法流新州未至屬開元元年册尊號赦曰元振往立大功保護于朕頃因閱武頗失軍容責情放逐將收後效可饒州司馬未至卒于道時年五十八有集二十二卷文章有逸氣爲世所重公少負氣縱橫遣意磊落作尉巴中不修名檢及登朝受任屢使遐方霜明烈心玉立貞

節言行忠正。居處簡約。飭體雜于皇王。致君期于堯舜。公務之暇。手不釋卷。雖子弟家人。未嘗見其喜怒。前後上疏切諫。得失十數道。俱焚其藁草。不以語人。故朝廷莫知也。睿宗嘗曰。元振正直。齊于宋璟。政理逾于姚崇。其英謀宏量。過之矣。舊于宣陽里居。二十餘年。不至諸院馬廐。每朝回對。二親言笑。歸室儼如也。不問家事。與狄仁傑。朱敬則。魏元忠。李嶠。韋安石。趙彥昭。韋嗣立。薛稷。張說等。爲忘年之友。事父母孝。聞父受授濟州刺史。後以爲相。奏請解職。授銀青光祿大夫。濟州刺史。致仕。公歿後。二親猶在。自我唐受命。宰臣有二親者。唯公而已。



# 張燕公集卷二十五

## 祭文

弔陳司馬書

正月癸亥。孤子范陽張說。頓首頓首。陳君之靈。頓伏苦蓋。遠辱慰疏。執對號慟。次于展洩。來使未還。傳君遇禍。盡哀寢外。傷心痛骨。明府兄毓德南邦。飛聲中夏。急人之急。憂人之憂。勇于履危。果于從政。入使天闕。有專對之美。按俗交州。見澄清之節。故得振衣衡管。割錦閩鄉。越嶂舊風。人狃輕剽。振之以淳俗。格之以華章。矯枉過中。斯害也已。齒由剛折。膏爲明銷。嗚呼陳君。婞直而殞。皇天輔德。問之何故。疇昔炎海。契闊周旋。義則友朋。恩結兄弟。方期歲暮。煜煜相榮。元髮未華。何圖零落。山濤猶在。嵇紹不孤。逝者有知。常昭是意。今返防關。力報前書。幽明雖異。交友無改。悲言下筆。涕泗從之。并往千錢。俾陳奠醑。歔歔萬里。哀哉。奈何。說頓首再拜。

弔國殤文

北伐兮東胡。邈遼陽兮孤竹。偏師兮覆衆。在崇山兮峽谷。露芘芘兮蔓草。風蓊蓊兮拱木。見馬血兮夜燃。聞殤魂兮雨哭。君王按金鼓而氣憤。撫珠鈴而淚滋。橫萬里兮抽恨。弔羣山而寫悲。懟凶將兮我辱。悼勇夫之被纍。彼殷鑒兮未遠。何後來兮不追。對死地兮出陣。臨傷門兮用師。軍奪帥兮虹食壘。車脫輻兮火

焚旗有變。鑿兮復矣。無范宣兮愧之。命窮迫兮短兵。錯膚迎刃兮血染。鏑旋殘潰兮棄組練。山猶號兮谷餘戰。燼原野兮奈何。違君親兮不見於戲。何天命之奄忽。俾仁義之禮兵。爲蠻夷之俘骨。讓大校之飛將。聞五營之勁卒。吾見出兮不歸。竟名存兮身沒。

奉勅赤帝壇祈雨文

維開元十年歲次壬戌四月壬申朔十四日乙酉。會臣侍中源乾曜。中書令張嘉貞。兵部尚書張說。謹以清酌昭告于赤帝。自冬涉春。至茲夏首。宿麥將秀。時雨未洽。皇帝降服減膳。避正廢縣。恐害黍盛。是憂黎庶。仁旨之勤已極。兆人之感未通。何辜于天。而此不惠。曾臣乾曜等同力聖日。無敢怠荒。薄才拙政。多所不及。神則不雨。或此之由。內訟惟惶。莫知啓處。曾臣等上無補袞。下不利人。妨功害能。負恩竊位。惟神臨照。簡擇其心。降禍厥身。墜祿殞命。三臣當咎。足謝天責。萬姓何辜。俾失農望。今因夏享。展禮既終。上抒聖衷。懇祈人命。至誠必感。佇流嘉液。旨酒獻誠。神其尙饗。

祭城隍文

維大唐開元五年歲次丁巳四月庚午朔二十日己丑。荊州大都督府長史上柱國燕國公張說。謹以清酌之奠。昭告於城隍之神。山澤以通氣爲靈。城隍以積陰爲德。致和產物。助天育人。人之仰恩。是關祀典。說恭承朝命。綱紀南邦。式崇薦禮。以展芹敬。庶降福四眚。登我百穀。猛獸不搏。毒蟲不噬。精誠或通。昭鑒

非遠。尙饗。

禁城門文

維大唐開元五年。荊州大都督府長史。上柱國。燕國公張說。謹遣議郎行錄事參軍皇甫暉。敢昭告于大府城門。天有三光。地有五行。陰陽順序。庶物以生。霖雨過旬。晦昧不晴。奈何以陰賊陽。以蒙蔽明。恐害嘉穀。無奉黍盛。維爾崇墉。本人所營。積陰攸處。德在助成。苟人是利。亦神之臧。速收雲雨。以復天常。報爾特豚。薦爾馨香。謹以清酌脯醢。式陳禁事。尙饗。

祭江祈晴文

滔滔大江。南國之紀。協靈通氣。降福禦災。是載方冊。代存祀典。歲惟季秋。苗稼大熟。霖雨猥集。農夫未收。油油秔稻。垂生芽孽。上則神威將廢。下則人心何仰。公私憂窘。靡禱不周。訴爾明靈。撤此雲雨。欽儲牲幣。俟答神休。謹以嘉酌脯醢。敬禱禋請。

賽江文

年月日朔。具官某。敢昭告于大江之神。王有百谷。禮尊四瀆。善利維神。朝海作賓。發源岷山。駕福來臻。率此荆土。明靈是主。已成嘉穀。垂收霖雨。聽我虔祈。福我農畝。既曠既穫。既場既庾。欣欣衆心。願答神祐。潔牲明酌。寅奠江浦。

祭殷仲堪羊叔子文

荊州府城中西北隅。舊有殷仲堪祠。說到官廣其堂。立羊叔子廟。像成而祭之。

維開元六年歲次戊午正月日。荊州大都督長史燕國公范陽張說。謹遣功曹參軍吳興沈從訓。敢昭告于晉羊殷二荊州之神。我聞立人之道曰仁與義。仁者孝之先。義者忠之主。殷公爲孝子。羊公爲忠臣。行植晉國。德施荊人。不孤其美。是建爲鄰。雙風雖舊。二廟維新。凡百君子。高山仰止。馨香以時。敬恭明祀。尙饗。

祭霍山文

長安二年月日。皇帝使并州道大行軍副大總管尹元凱等。敬薦酒醑時果。敢告霍山之神。皇帝天覆萬物。各遂其性。祠于羣神。罔不咸秩。獨彼凶虜。默啜悖天。虐人窺邊。猶夏略無寧歲。皇帝哀此黎獻。勤於征役。憫彼夷落。毒于昏暴。常欲誅其魁首。安是藩毗。寇虐盈稔。神人同棄。今自送死并朔。近驚山陵。命將出師。恭行天罰。惟神炳靈。參野作鎮。冀方歆是正直。贊揚威武。俾敵馬化爲沙蟲。王師衆于草木。獻捷之日。昭報神休。尙饗。

祭崔侍郎文

維神龍三年月朔日。兵部郎中員外曹良史等。謹以清酌少牢之奠。敬祭故侍郎崔公之靈。位以行成。名以才起。天臨明代。是生君子。長戟高門。層堂峻址。友孝仁愛。衣冠標軌。清通正直。省閣條理。束帶立朝。惟國之俊。抑揚吐納。金聲玉振。器不滯方。神無留韻。厚奉外不爲假。坦率內不違真。泛交而容博。好施而能均。欲人規己。恕己及人。故者不遺其故。親者無失其親。歷否泰能全其節。故令名不離其身。方齊六相助。

明三辰。何孤我德。何負茲神。搏空落羽。中駕摧輪。昔時寮列。今爲弔賓。凡二三子。夙承遊眷。聯務七兵。歲陽三變。分與時積。事由更練。審審公庭。中中私宴。慟音徽之永掩。懷舊範之不見。戢容止於綴足。潛眉目於蒙面。哀哉奈何。涕零如霰。緬惟初疾。以迄將亡。意氣精爽。乾乾自強。顧瞻賓客。勉勉矜莊。几不側弁。衾無解裳。話言靜密。憂公不忘。猶看駿馬。尙聽名倡。靡神不禱。靡藥不嘗。脩焉信宿。俄歸眇茫。歲初置酒。春中酌觴。何吉凶之共域。同歌哭于此堂。自古及今。人誰不沒。豈嘆生死。所嗟倉卒。修途未半。壯志先伐。蔡子亂年。遺允數月。在親親與懷舊。孰不傷心而痛骨。虛奠易收。深悲難歇。尙饗。

爲河內王作祭陸冀州文

維萬歲通天元年。月朔日。神兵道大總管。河北道接撫使。右金吾衛大將軍。河內郡王。以少牢之奠。致祭故冀州刺史陸君之靈。戎羯不道。侵軼幽都。凶渠殄滅。餘燎星鋪。鳴弓射柳。飲馬長蘆。攬集同惡。難起無虞。梟獍爲旅。鯨鯢有族。裳旗未兵。剗荻弦木。泮渙吞噉。睚眦觸逐。亂舞梯衝。潛攻版築。鑿齒爭厲。熊蹯未熟。踰垣自潰。守陴皆哭。高局已陷。連樓復焚。人類薙草。城隨壞雲。僵屍暴骨。藉藉紛紛。嗟嗟使君。死節無恠。政寬成俗。兵機不振。狡爾猖狂。難以德鎮。城爲仇保。身膏虜刃。明明上帝。仁覆憫下。赫赫神兵。驅馳在野。朝告夕赴。如何不及。將守非堅。爲寇是急。救兵適來。涉血猶濕。三軍雷歎。百城雨泣。天子命我。董戎冀方。旌旗介冑。千里相望。旣掃氛濁。言巡戰場。輯穆人吏。撫寧孤孀。徘徊城府。悽愴甘棠。禮重王師。哀深國殤。魂兮有感。歆此嘉嘗。

爲魏元忠作祭石嶺戰亡兵士文

維長安二年月朔日勅并州道行軍大總管兼宣勞使左肅政御史大夫同鳳閣鸞臺三品兼知并州事魏元忠遺裴思益以酒脯時果之奠致祭于石嶺戰亡兵士之靈戎羯慢天南牧吠主石嶺橫地北都局戶興我王卒保界并土如何不弔罹此寇虜列鎮旣嚴連巖旣削攻則路險守非城則彼謀匪臧實愆偕作援絕兵滅軍孤勢弱地拒兩陁山望雙鵲塵烟大起白刃交錯石盡矢窮旗焚胄落嗟爾戰夫烈烈忠勇奮不顧命志無旋踵身沒名揚生輕義重天子命我理兵晉陽思與士衆底寧遐荒痛茲壯士剪爲國瘍盍訴天帝降厲鬼方助氣金鼓復怨沙場虜血爾醑虜醢爾嘗封尸死所招魂故鄉尙饗

爲魏元忠作祭石嶺沒陷士女文

維長安二年月朔日勅并州道行軍大總管兼宣勞使左肅政御史大夫同鳳閣鸞臺三品兼知并州事魏元忠以酒脯時果之奠致祭于石嶺死喪百姓之靈北敵自擅賊虐不道氣悍朔風馬肥秋草侵軼郡縣驚逼稚老奔走山林是障是保兵不善守將不遠謀如何滅竈無復燒牛俾爾士女燿于寇仇魂飛狄刃血迸氈裘殤悲雨哭氣怨天愁總兵帝鄉言念北阜抗憤戎漠傷心按部泣弔郊童哀問田叟爲爾復惡誓滅羣醜蹴踏蘭山脂膏葦藪誠若克就沒亦不朽慰爾衆靈酌此簞酒尙饗

爲人作祭弟文

維景龍元年月日朔從兄兵部尙書某以清酌少牢之奠致祭于故將軍弟之靈欽若貽宴俾降馘穀神

祚玉衣。天開金屋。絳系溢寵。諸宗橫福。覩交泰之二儀。承序殷之九族。引同本于條榦。合分流于昭穆。義有感而意深。恩無方而情篤。況山慕喬頂。林晞秀木。深仁遠愛。俟子能復。何從才之有餘。而輔德之不足。舉朝野而皆痛。在密愛而尤酷。嗚呼哀哉。永懷令弟。言念生平。蘭華雪艷。玉潤珠清。禮樂縣解。文章挺生。三篋暗記。千門畫成。風流望美。月旦傾聲。掌北軍之師律。首東觀之詞英。偉壯夫之獻頌。善仁者之論兵。嗟新豐而臨幸。遶湯井而連營。乃奉車之暴逝。忽復綏而凶行。軫天悲于宸掖。固聚族於華京。惠連詩夢。子敬琴情。倘昭昭之不泯。知親親之素誠。嗚呼哀哉。尚饗。

爲人作祭弟文

維年月日。兄某。致祭亡弟尚書之靈。天實喪予。不愆遺善。家殞玉樹。國墜寶臣。嗚呼執柔。何痛之甚。嗟予與爾。夙遭閔凶。哀惇相鞠。殆及長成。爾性岐實。穎德表宣。慈居盡友弟之心。言必忠貞之事。緜緜我族。俟子而大。奉祖德之令圖。荷朝戚之惠渥。白首相對。紫綬雙紆。爾既秉國鈞。既敷朝典。出牧千里。入宰六官。予聞爾言。嘗誠過寵。余嘉爾行。在貴能卑。清淨溫恭。每希于上士。飲食車馬。不越于平人。每思與爾。歸印東都。懸輿故里。揚名講德。居常待終。嘗謂老夫沒于汝手。不圖令弟殞自我先。及爾纏疴。屬予伏枕。不見數日。長悲九泉。嗚呼。刊述未成。平生已盡。髮膚猶在。魂魄焉知。聞爾屬纊之辰。託予身後之事。簿葬之禮。還從爾心。字孤之情。不待遺意。所恨在疾不視。于喪不臨。沉緜苦懷。纏迫斯甚。予羸老矣。傷心幾何。人琴兩亡。命也命也。

爲鄭虛已作祭舅文

維年月日。外甥虛已。謹以清酌少牢之奠。敬祭于故汴州司馬。四舅之靈。疊積周親。天禍外氏。仁舅捐館。靈輶祖庭。四海喪其範儀。九族失其陰潤。感今循昔。觸緒增悲。恭惟先門。逮舅平日。淵流莫逆。道術同歸。穆齊鄭之累姻。深言孫之至友。及鞠凶之際。創巨失圖。賜厚獲葬之恩。事優含哺之育。顧省全立。功歸撫卹。竊荷濟于百罹。思効過于一等。豈期德素積而力莫酬。願未申而禍先集。不孤之記。緬爾何依。猶父之心。忽焉罔報。冥昧靡覲。存亡永違。執饋奉酌。五性含塞。幽靈昭察。當歆宿誠。

祭和靜縣主文

維年月朔日。敬祭薛氏太夫人和靜縣主之靈。惟夫人軒庭繁祉。羸臺茂淑。承訓公宮。宜家卿族。博士學藝。尚書題目。法度蘋蘩。儀刑松菊。夫拜中令。昔同鮑婦。子昇瑣闥。今類馮母。舉案如賓。闔門誠友。在貴能降。居貧施厚。天道初革。王風變韶。維城落搆。若木疎條。欽聞積善。智洽仁昭。克庇二族。命服兩朝。肅肅柔和。如風是暢。娥娥女師。如月斯望。潘輿獻壽。仲祿方養。不弔昊天。何德之喪。嗚呼哀哉。洛邑啓殯。長安歸陌。哭慟高臺。旌縣舊宅。階濕夜露。庭陰曉魄。嗟我外姻。俱成弔客。

爲將軍高力士祭父文

維開元十七年月日。孝子力士。敢告于考潘州府君。妣南海太君之靈。小子不天。夙齡閔凶。身嬰寇剽。家值虜裂。幸供灑掃之餘。遂蒙侍從之顧。扶戴明聖。逼畏艱難。大固不敢不密。小亦不敢不誠。事必記心。言



無漏口日慎一日。將二十年。玉弁加首。金章在佩。先靈佑納。明神降鑒。阿母遠至于京華。妹兄自拔于泥滓。咸以官漸榮祿。姻通士林。慈顏顧復于目前。同氣展歡于膝下。又緣幼育高氏。變族移家。敬愛盡於二堂。溫清周于一紀。不圖無狀招禍。永見孤棄。聖主恩華。曲逮存歿。邑封舊郡。官贈本邦。親感恩澤。子承父意。致命報天。誓有同于傲日。竭忠資孝。志無忝于幽泉。敬惟靈懷。慰聞昭遂。先遠有日。卜兆新塋。遙啓尊魂。合耐良壤。哀迫祖載。攀戀須臾。請以清酌。少牢。恭陳遺奠。盈樽不舉。虛饌莫嘗。號天叩地。殞絕何仰。

爲妓女祭元十郎文

維神龍三年月朔日。故妓人伏十善。謹以清酌。少牢之奠。致祭于元十郎之靈。淥流茂樹。萍蘿是依。山崩川竭。魚鳥何歸。恭惟主君。高才達節。賞心樂事。風流不絕。歌豔露華。舞迴春雪。幸持此技。承君餘悅。綺羅脂粉。嬌上春。自言終代保情親。寧知一旦君魂斷。繁絃清管。爲何人。懷主君之一顧。願殉命于九原。迫夫人之嚴旨。遂投足於他門。生有十年之愛。沒無一日之恩。雖強容飾于新奉。心摧絕而不敢言。君子廣德。仁心必遍。疇昔與君。琴樽歡宴。永懷蕙歎。俯憐荼苦。錫以時珍。申哀故宇。厥車旣展。祖奠斯開。悲歌助挽。長袖乘盃。平居好此。魂來不來。心思往而莫遂。足欲返而遲迴。終天地于此訣。毒煩冤而難裁。嗚呼哀哉。尙饗。

